




TAUSAGA 8



FAKASOLOGA O ULUTALA

VAEGA 1: Pateliaka

Ulutala	1. Apelaamo	5
Ulutala	2. Isaako	6
Ulutala	3. Iakopo	8
Ulutala	4. Iosefa	10
Ulutala	5. Ko te tinoagafulu mo te tokolua tama tagata A Iakopo	11

VAEGA 2: Famasino

Ulutala	6. Otinielu	13
Ulutala	7. Tepola	14
Ulutala	8. Kitiona	16
Ulutala	9. Samasoni	17
Ulutala	10. Samuelu	19

VAEGA 3: Pelofeta:

Ulutala	11. Elia	20
Ulutala	12. Elisaia	21
Ulutala	13. Palaamo	23
Ulutala	14. Iona	24

VAEGA 4: Tupu

Ulutala	15. Saulo	26
Ulutala	16. Tavita	27
Ulutala	17. Solomona	29
Ulutala	18. Leopoama	30
Ulutala	19. Iosia	32

VAEGA 5: Faitaulaga:

Ulutala	20. Alona	33
Ulutala	21. Eli	35
Ulutala	22. Esela	37
Ulutala	23. Simeona	38
Ulutala	24. Sakalia	39

VAEGA 6: Ulu manumalo, mate, toetu o Iesu		
Ulutala	25 Ko te Ulumanumalo	41
Ulutala	26. Ko te fakasatauloga	42
Ulutala	27. Ko te toetu	43
VAEGA 7: Ko tena fanau mai		
Ulutala	28. Ko te folafolaga kia Malia	44
Ulutala	29. Ko te folafolaga kia Iosefa	46
Ulutala	30. Ko te folafolaga ki tausi mamoe	48
Ulutala	31. Ko te fanau mai o Iesu	50
Ulutala	32. Ko mealofa a tino poto	52
VAEGA 8: KO ASO FAKAMANATU		
Ulutala	33. Asotapu o te Talalei	55
Ulutala	34 Asotapu o Matua	56
Ulutala	35 Asotapu o Tamana	58
Ulutala	36 Asotapu o Talavou	59

TUSI AKOGA ASOTAPU MÔ TE TAUSAGA 8
TUSI MÔ FAIAKOGA

Ne fakatokagina a te Tusi Akoga tenei mai loto i te Ulu Ofisa o te Ekalesia Kelisiano Tuvalu i Funafuti mai lalo o te Matagaluega o Talai mo Akoakoga Faka-Kelisiano

A mataupu konei ne fakatoka katoa mai lalo o te akoakoga fakamasani mô te kalikulamu fou tela ne faigina ne tena 'Malu, Faifeau Tokita ko Arun Gopal mai i Initia ki Saute.

Te fakamoemoega maluga ke aogã a te tusi tenei mô tatou faiakoga e fesoasoani mai ki te fakatokaga o 'tou mataupu mô te fagaiga o agaga o fanau gasolo o 'tou Ekalesia kae maise 'tou Atufenua. Te faitu tãua e 'se ko te tauloto fua mai loto i te tusi tenei, kae ko te fakaaogaga o te Tusitapu, faitau faka'lei ki ei kae ko fesoasoani atu ei a fakatokãga konei ko te mea ke faka-atili mãina ei a tena Muna.

Fai'tau a te Muna a te Atua. Fai talosaga mô tena Agaga Tapu kae fakalagolago ki tena poto mo tena malosi e mafai ei ne tatou o fakatino a 'tou tusaga tãua konei e tautua atu ei tatou ki te Atua. A te kalagagina o tatou faka-faiakoga e se se kalaga fãtauvã, kae se tiute fakatino o akoako atu a te Muna a te Atua ki ana meaalofa mô te Ekalesia, kola ko fanau gasolo o 'tou Ekalesia.

Ke masaua ne koulua faiakoga me tafasili atu a te mafa te taa fakamasinoga ilo niisi (Iakopo 3:1)

Ke fakamanuia atu a te Atua ki aulua galuega kae maise ko oulua olaga tautua i loto i tena Galuega.

MANATU FAKAVAE: TALITONU KI TE ATUA

VAEGA 1: PATELIKA

ULUTALA 1: APELAAMO

Pogai: Ke akoako a tama'iki ke iloa ne latou a te talitonu mo te fakatua-naki o te Pateliaka ko Apelaamo ki te Atua.

Tusi Faitau: Epelu 11:8-10

Fakatokāga mo Faia'koga:

Pateliaka se pati ne vau mai luga i te pati Epelu tela tena uiga "*Ko Tamana o te Fakatuanaki o te Talitonuga Faka-Kelisiano,*" pela mo Apelaamo, Isaako mo Iakopo. A Apelaamo, Nakoli mo Halana, ko tama'iki ta'gata a Tala. A Sala te avaga a Apelaamo ko te tamaliki fafine foki a Tala kae e matua kese'kese mo Apelaamo (Ken 20:12). A Apelaamo ne fakaigoa me ko te tamana o tino fakatuanaki katoa ona ko tena fakatuanaki ki te Atua kae ko ia se tagata foki e fakalogo kae matakū ki te Atua. Ne tiaki ne ia a tona fale mo tona fakai kae ne fano ki te koga ne kala-gagina a ia ne te Atua ke fano a ia ki ei (Ken 12:4); Se tagata e alofa kae se kaimanako, ne seki mafaufau ki tona 'lei tokotasi kae ne tuku loa ne ia ki tona tuatina ko Lota ke fili muamua a te koga e manako a ia ki ei (Ken 13:9). E loto malosi kae toa tela ne fakatakavale ne ia a kautau kola ne puke ne latou a Lota mo tino Sotoma (Ken 14:14); ne seki togigina a tena manumalo ki tupe io me ne tavaega, ne seki talia ne ia ke togi a ia ona ko te fakasaoga ne ia a tino kola ne puke mai i Sotoma (Ken 14:23); se tagata e fiafia ki te 'talo (Ken 18:23-33) kae takutakua i te fakatuanaki me ne seki ita ma ofo atu a tena tama e iloa e tokotasi ko Isaako mo fai a te taulaga e pela mo te manakoga o te Atua.(Epe.11:17).

Mea a'koga mo fakamaina ei a te mataupu:

Fakaaoga a te ata napa #15

Fakatomuaga:

Sea a te "Fakatuanaki"? (Ke fakamatala faka'lei ne te faiakoga a te uiga o te fakatuanaki ke malama'lama i ei a tama'iki). Masaua me e 'kese a te fakatuanaki mo te fakalogo, tela la ke maina faka'lei a tama'iki i te 'kesega tenei.

Akoakoga:

I te olaga nei, e manakogina ke fakanã, fakalagolago tatou ki te Atua. E pela mo Apelaamo, a ia se tagata fakatuanaki, ne fakatonu ne te Atua ke fano ki se fenua e se iloa ne ia, tela ne fano e iloa a ia i tena talitonu o tena fakatuanaki ki te Atua me ka takitaki e iloa a ia ne te Atua ki te fenua fou tena. Tela la tama'liki, e tãua ke iloa ne tatou me i te olaga fakatuanki ki te Atua e fakaasi i ei a 'tou faka'logo mo 'tou tali'tonu ki te Atua. Kae maise e maua i ei ne tatou a fakamanuiaga a te Atua. Fakatuanaki ki te Atua i so se mea tela e faigata ki a koe, kae ka fesoasoani mai a Ia ki a koe.

Mea fai a Tama'liki:

Ke fakatoka ne te Faiakoga ne fesili kola e mafai o tali ne tama'liki mai i te tala kae e fesoasoani ki te fakalauefaga o te malamalama e uiga mo te pati tenei ko te "Fakatuanaki".

Fuaiupu Tauloto: Ioane 3:16 Me ne pena e iloa o alofa mai te Atua ki te lalolagi, ne tuku mai ei ne ia tena Tama e tokotasi, ko te mea ke se malaia so se tino e fakatuanaki ki a ia, kae ke maua ne ia te ola se gata mai.

Pese: He`s all I need io me fili mai tusi pese

Talosaga: Fakafetai te Atua mo te motou lesona i te aso tenei, fakamanuia mai mo matou kae akoako mai matou ke fai matou pela mo Apelaamo, ke tali'tonu kae fakatuanaki matou ki a koe i aso katoa o motou olaga. Amene.

ULUTALA 2: ISAAKO

Pogai: Ke akoako a tama'liki ke iloa ne latou a te tãua o te fakalogo.

Tusi Faitau: Kenese 22:6-14

Fakatokãga mo Faia'koga:

A te uiga o Isaako ko te katakata io me ko te tamaliki ne 'nofo fakatalitali ki ei. A Isaako se tamaliki fakalogo (Ken 22:6-9) me ne

katalitalii ki ei. A Isaako se tamaliki fakalogo (Ken 22:6-9) me ne fakalogo ki fakatonuga katoa a tona tamana ko Apelaamo; se tagata e nofo filemu kae se fakatupu taua (Ken 26:19-22); se tagata e fakamaoni o tapuaki ki te Aliko (Ken 26:25) kae fakatuanaki foki ki te Atua e pela mo tena tamana ko Apelaamo (Epe.11:20).

A te mamoe se manu e fakaaoga ne tino Isalaelu mo fai a olotou taulaga ona me tena te manu e ola 'lei kae tausi ne latou, e penei mo tatou i Tuvalu nei e fagai kae tausi a puaka, taki mo moa; i te sua feitu, te mamoe ko te manu e atagina i ei a te filemu mo te lotomalalo me se manu e nofo'umu kae se kaitaua.

Mea a'koga mo fakamāina ei a te mataupu

Ata napa 18.

Fakatomuaga:

Ko oi a tama'liki e faka'logo ki olotou matua? A te tamaliki fakalogo, e fakafiafia ne ia a tena matua mo tena tamana, kae ko te tamaliki se fakalogo ea?*(ke tali mai ne tamaliki).*

Akoakoga:

E isi ne tama'liki, ko latou e iloa ko faka'logo ki olotou matua mo olotou tamana. E tenei foki e iloa a te mea e manako ki ei te Atua ke fai ne koutou tama'liki, ke fai koutou mo tama'liki faka'logo. E pela mo Apelaamo, mai i tena fakalogo ki te Atua, ne fai e iloa ne ia te mea e loto ki ei te Atua. E tonu ia Apelaamo e alofa ki tena tama ko Isaako, kae ne fai e iloa ne ia a te mea e manako ki ei a te Atua. E manakogina foki ko koutou tama'liki ke faka'logo ki outou matua pela foki mo te Atua. Se gata i ei, tena tama ko Isaako ne fakalogo foki e iloa, ne seki 'teke ki tena tamana, ne seki taumafai o tele kae ne fakalogo loa o fai a te mea e loto ki ei a tena tamana. Tela la, ke masaua ne koutou me i te Atua e alofa malosi ki te tamaliki tela e fakalogo. Ke faka'logo tatou ki 'tou matua kae maluga i ei, ke faka'logo foki tatou ki te Atua me e pule i 'tou ola kae e aumai foki ne Ia a te fakafiafiaga lasi ki 'tou olaga.

Mea fai a Tama'liki:

Ao/ikai

A te fakalogo e fakafiafia ne koe a ou matua pela foki mo te Atua?

Se mea 'lei ke fakalogo koe i tou olaga katoa?

E mata e fakafiafia ki tino mafai koe se tamaliki e se fakalogo?

Fuaiupu Tauloto: Efeso 6:1 A koutou e tama'liki, se tiute faka – Kelisiano o koutou, o faka`logo ki otou matua, me tena eiloa te mea tonu e `tau o fai ne koutou.

Pese: When we walk with the Lord io me fili mai tusi pese

Talosaga: Te Atua te motou Tamana, fakafetai mo omotou ola ne tuku mai ne koe. Fakamanuia mai matou, kae akoako mai matou ke fai matou mo tama'liki faka'logo i omotou olaga tupu ake kae maise ke iloa ne matou o ma'taku kae faka'logo ki a koe. Amene.

ULUTALA 3: IAKOPO

Pogai: Ke fakaakoako a tama'liki ke iloa ne latou me i te loto kufaki e maua i ei a fakamanuiaga.

Tusi Faitau: Kenese 32:22-32

Fakatokāga mo Faia'koga:

A te uiga o te igoa o Iakopo ko te "sui-tulaga", a ia ko te tamaliki tagata a Isaako mo Lepeka. A Iakopo ne fakavae mai i ei a te fenua o Isalaelu i ana tama'liki tagata kola e tinoagafulu ma tokolua mo tena tamaliki fafine ko Tamala. A tena igoa ne `fuli fakamuli ne te Atua ki a "Isalaelu" tena ne mafua mai i ei a te fenua o Isalaelu. A Esau ko te masaga matua o Iakopo kae ne fiakai ki te supu-pini a Iakopo ne tunu. Ne talia ne Iakopo ke kai a Esau ma tuku atu a tena tulaga toekimua ki a ia (Ken 25:29-32). Fakamuli ifo, ne fakaloilo i ne Iakopo a tena tamana tela ne puke i ei ne ia a fakamanuiaga kola ne `tau loa o maua ne Esau me ko ia ko te toekimua (Ken 27:9-29). Ona ko te amioga tena a Iakopo, ne manako ei a Esau o tamate a Iakopo (Ken 27:41); ne sola a Iakopo ki te tuagane o tena matua ko Lapana i Halana (Ken 27:42-43), kae i tena toe fokimaiga, ne matakū malosī a ia i tena taina ko Esau.

Mea a'koga mo fakamāina ei a te mataupu:

Fakatoka ne te Faiakoga te ata o te tā'fitiga a Iakopo mo te Atua.

Fakatomuaga:

A koutou e tāʻfiti saale? Ko oi a te tamaliki e sili saale manafai e tafiti? Nei, ka fakalogologo tatou ki te tala o te ʻtafitiga a Iakopo mo te Atua.

Akoakoga:

I loto i ʻtou olaga, e uke a tulaga kola e fakataufai i ei tatou, koutou tamaʻliki i loto i te akoga, i tafaoga, a tatou e maʻnako katoa ko tatou ke ʻsili io me ke maua ne tatou ne tulaga ʻlei. E maʻnako tatou ke maua ne tatou a te manumalo. E tena foki a te mea ne fai ne Iakopo i te tāʻfitiga mo te Atua. Ne taumafai malosi ke manumalo a ia, kae ne maua e iloa ne ia a te manumalo mai i tena lotomau mo tena loto kufaki. Ona la ko te lotomau o Iakopo tela ne taofi mau e iloa ne ia a te Atua kae fai ki ei me ia ia e se tuku ke fano vagana ko oti ne fakamanuia mai a ia. Tela la, ne fakamanuia i ei ne te Atua a Iakopo. E tenei foki e iloa a te akoakoga taua mo tatou, ke loto malosi tatou, ke loto mau, loto kufaki me e fakafiafia a tena ikuga. E maua ne tatou a te fakamanuiaga a te Atua manafai e tumau tatou i te fakaʻlogo mo te fakatuanaki ki a ia.

Mea fai a Tamaʻliki:

Tali a fesili kola e fakatoka ne te faiakoga

Fuaiupu Tauloto: Epelu 10:36 E ʻtau mo koutou o kufaki, ko te mea ke fai ne koutou a te loto o te Atua, ke maua a te mea ne folafola mai ne ia.

Pese: Thy loving kindness io me fili mai tusi pese

Talosaga: Te Atua alofa, e maua ne matou a te manumalo i te tino kola e ʻse mai ki a latou.

Tusi Faitau: Kenese 45:1-15

Fakatokāga mo Faiaʻkoga:

A Iosefa ko te tamaliki matua a Iakopo ia Lasela kae ne fanau a ko Iakopo ko matua. A Iosefa se tagata fai-moe-miti kae atamai foki i te fakamatalaga o moemiti. A ia ko te tamaliki fakapelepele e iloa a Iakopo mai tafa o ana taina katoa. Ana taina ne se fiafia ki a ia kae ne fai fili ki a ia, ne togi a ia ne ona taina ki tino Mitiana ona ko te olotou lotomasei ki a ia (Ken 37:25-28) kae ne fakatau atu a ia ne tino Mitiana ki a Potifa

‘kaufakatasi mo koe. Tuku mai ki a matou a te lotomau ko te mea ke pena foki o maua ne matou au fakamanuiaga. Amene.

ULUTALA 4: IOSEFA

Pogai: Ke fesoasoani o fakamalamalama ki tama’liki ke iloa ne latou me i tino kola e tali’tonu ki te Atua e ‘tau o fakamagalo ne latou a tino kola e ‘se mai ki a latou.

Tusi Faitau: Kenese 45:1-15

Fakatokāga mo Faia’koga:

A Iosefa ko te tamaliki matua a Iakopo ia Lasela kae ne fanau a ko Iakopo ko matua. A Iosefa se tagata fai-moe-miti kae atamai foki i te fakamatalaga o moemiti. A ia ko te tamaliki fakapelepele e iloa a Iakopo mai tafa o ana taina katoa. Ana taina ne se fiafia ki a ia kae ne fai fili ki a ia, ne togi a ia ne ona taina ki tino Mitiana ona ko te olotou lotomasei ki a ia (Ken 37:25-28) kae ne fakatau atu a ia ne tino Mitiana ki a Potifala te kapeni pule o sotia tausī a te tupu o Aikupito. A Iosefa se tagata alofa kae ne fakaasi ne ia ki ona taina me ko te Atua loa ne fakatoka ne ia a mea tupu i tena olaga tela ko mafai i ei ne ia o fesoasoani o faka’sao a latou mai i te oge (faitau 5e, 7). E lavea gofie i te tala me i a Iosefa se tino e fakatuaga ki te Atua tela ko lasi atu a tona alofa ki ona taina i loo te tauī atu ne ia ki ona taina a te masei.

Mea a’koga mo fakamāina ei a te mataupu:

Ata napa 22.

Fakatomuaga:

Ko oi e taua saale mo ana taina io me mo niisi tama’liki? Sea a te mea e ‘tau o fai ne koe mafai e fai taua atu se tamaliki ki a koe?

Akoakoga:

Mai i te tala o Iosefa mo ana taina, e akoako mai ki a tatou tama’liki me e se ‘tau mo tatou o fai taua io me fai fili ki niisi tamaliki, kae e ‘tau mo tatou o a’lofa kae fakamagalo atu ki tino kola e ‘se mai ki a tatou pela mo Iosefa ne fakamagalo ne ia ona taina e ui loa a te

ki a tatou pela mo Iosefa ne fakamagalo ne ia ona taina e ui loa a te masei o te mea ne fai ne latou ki a ia. A Iesu foki ne fakamagalo ne ia a sotia mo tino kola ne fakasataulo ne latou a ia. Masaua a te talo ne akoako mai ne te Aliko, e `tau mo tatou o fakamagalo atu ki tino kola e `se mai ki a tatou me i te Atua ko oti ne fakamagalo ne Ia a `tou agasala katoa e auala ia Iesu Keliso.

Mea fai a Tama'liki:

- Fesili:

Se a te mea ne fai ne Iosefa ki ona taina?

Tali: Ne fakamagalo ne ia ana taina.

2. Sea te mea e manako a te Atua ke fai ne tatou manafai e `se mai se tino ki a tatou?

Tali: Ke fakamagalo ne tatou a latou kola e `se mai ki a tatou.

Fuaiupu Tauloto: Kolose 3:13e E pela mo te Aliko ko oti ne fakamagalo ne ia koutou, e `tau foki mo koutou o fakatau fakamagalo.

Pese: God forgave my sins io me fili mai tusi pese

Talosaga: Fai fakatasi a te Talo a te Aliko.

ULUTALA 5: KO TE TINOGAFULU MO TE TOKOLUA TAMA TAGATA A IAKOPO

Pogai: Ke akoako a tamaliki ke fakamalosia a te olaga fakamaoni mo te fakataualofa i vasia o latou faka-tautaina, faka-tautuagaene pela foki mo olotou vasia faka-taugasoa.

Tusi Faitau: Kenese 50:15-21

Fakatokāga mo Faia'koga:

A Iosefa ne fakamagalo ne ia a ona taina kae koi tuai loa o mate a te olotou tamana (Ken 45:5, 7). A ona taina ne `nofo loa mo te sapolepole ke oko ki te taimi tenei ko mate iei a Iakopo te lotou tamana, e fakaasi mai i konei me ko lagona ne latou a te loto salamo kae maise ko lavea ne latou a te masei o te lotou aofaga ne fai ki a Iosefa. I te faitau 19, muna Iosefa, ia te Atua loa a te fakamasinoga kae kia au a koutou

ko leva loa ne magalo ia au. Faitau 20, ne fai ne taina o Iosefa se uiga masei kae ki te Atua ko te auala e faka'sao i ei a te lotou kaiga katoa i te taimi o te oge.

Mea a'koga mo fakamāina ei a te mataupu:

Ata napa 22.

Fakatomuaga:

Mata a te fakamagalo ne koe o se tino tela ne fai ne ia se mea se 'lei ki a koe e faigofie me ikaai? Ke toe fakalogo'logo aka tatou ki te tala o Iosefa mo ana taina.

Akoakoga:

I te olaga tenei, e fakafeagai tatou mo taua, fakakinauga, mo nisi fakalavelave e uke kola ka tofotofogina i ei a 'tou fakatuanaki. A fakakinauga konei, e 'tupu i 'tou taugasoa i loto i akoga, io me i loto i kaiga i vasia o taki tautaina mo taki tautuagaene.

I so se tulaga penei e tupu io me e fetau mo tatou ke masaua a te tala o Iosefa mo ana taina. Iosefa ne talitonu kae fakatuanaki ki te Atua tela ne 'fuli i ei ne te Atua a fuifaiga mo fakalavelave konei ki fakamanuiaga e uke i te olaga o Iosefa.

Kafai foki tatou e tali'tonu kae fakalogo ki te Atua, ka takitaki kae pui-pui ne ia 'tou olaga. Ona la ko Iosefa ne lasi tena talitonu ki te Atua, ne lotomalie o fakamagalo a te mea 'se a ana taina ne fai. Tela la, ke fakataua'lofa tatou kae fakatau fakamagalo ne tatou a tino kola e 'se mai kia tatou e pela e iloa mo te talo a te Aliko e talo saale ne tatou me tena e iloa a te finagalo o te Atua mo tatou.

Mea fai a Tama'liki:

Sautalaga te faiakoga mo tamaliki e uiga mo te olaga fakamagalo.

Fuaiupu Tauloto: 1 Ioane 4:7 "Oku taugasoa pele, ke fakatau a'lofa tatou, me i te alofa e vau mai i te Atua"

Pese: God forgave my sins, in Jesus' name! io me fili mai tusi pese

Talosaga: Te motou Atua alofa, akoako mai matou ke iloa ne matou o fakataua'lofa i te sua tamaliki ki te sua tamaliki e pela mo koe e

fa mai ki a matou. Ke i luga ia matou katoa a tou alofa mo tou filemu i te taeao nei, ke oko atu e iloa ki te se gata mai, ona ko Iesu te motou Fakaola. Amene.

VAEGA 2: FAMASINO

ULUTALA 6: OTINIELU

Pogai: Ke akoako a tama'liki ke iloa ne latou me i te talitonu ki te Atua e maua mai ei a te manumalo

Tusi Faitau: Famasino 3:7-11

Fakatokāga mo Faia'koga:

A Famasino ne tino ko oti ne fakaeke ki a latou a te malosi o fakatoka a faka-kinauga mo tulaga se-tonu i loto i Isalaelu, ko te mea ke maua se filemu i vasia o tino. I tala-tukufakasolopito o Isalaelu, a famasino ne filifiligina ne te Atua kae e masani loa ko matai o kaiga io me ko toaina ma'tua o matakaiga. A Famasino kola e faipati ki ei a te mataupu kola e feagai mo tatou nei, ne tino ne filifili ne te Atua mai i tino toki-fatoaga, sotia, io me ko tino kola e loto ki ei a te Atua ke fai mo takitaki o taua o faka'sao a Isalaelu mai i olotou fili.

Te tapuaki ki a Paala mo Asaila se faifaiga tela e agasala i ei a Isalaelu ki te Aliko kae fai ne ia ke kaitaua a te Atua ki tino Isalaelu. A Asaila ko te avaga fafine a Paala kae tapuaki ki ei a tino e pela mo te tapuaki o latou ki a Paala. A Paala se atua o tino Tulo kae ne aumai ki Isalaelu ne te Penenise fafine o Tulo ko Iesepela tela ne avaga ki te tupu o Isalaelu ko Aapo.

A Otinielu te tamaliki tagata a Kenasa te taina foliki o Kalepo, ne avaga mo te tamaliki fafine a Kalepo i te fakatakavalega ne ia a te fakai ko Kiliata Sefelo (Iosua 15:15-19). Ne fakatakavale foki ne ia a Kusana Lisaitaima te tupu o Mesopotamia i te malosi o te Atua.

Mea a'koga mo fakamāina ei a te mataupu:

`Sala ata kola e tau tonu mo te mataupu

Ata vitio mafai e isi

Fakatomuaga:

Kai a a tiimu futipoolo kafai koi tuai o tafao e maopoopo saale ki loto kae

`talo fakatasi?

Akoakoga:

Te tala o Otinielu e fakamalosi mai ki a tatou, me i te talitonu ki te Atua e manumalo ei koe mo au i so se mea e fai ne tatou i te olaga nei. A tatou la e se manumalo i se taua, kae ke manumalo tatou i so se fakalave-lave io me se faigataga e fakafeagai mo tatou i te olaga nei. Tatou e tama'liki e `tau o talitonu ki te Atua kae faka'logo ki `tou matua e pela mo Otinielu. Ka maua ne tatou a te manumalo kae ka fakamanuia foki tatou i `tou olaga tupu aka e pela mo Otinielu ne fakamanuia ne te Atua tela ne manumalo ei a ia kae se takavale i te taua.

Mea fai a Tama'liki:

Lomi kae kala (ata ke fakatoka ne te faiakoga)
Sautalaga a te Faiakoga mo ana tamaliki akoga.

Fuaiupu Tauloto: Salamo 60:12 "E manumalo matou manafai e kau te Atua i a matou; Ka fakatakavale ne ia omotou fili".

Pese: We got victory in our hearts io me fili mai tusi pese

Talosaga: Te Aliko, fakatumau ia matou a te loto talitonu ki a koe ko te mea ke mafai ne matou o manumalo i so se fakaosoosoga e fakafeagai mo matou. Amene.

ULUTALA 7: TEPOLA

Pogai: Ke fakamalosi ki tama'liki ke talitonu me i te Atua e tausi ki a latou kola e fakatuanaki ki a Ia

Tusi Faitau: Famasino 4:1-17

Fakatokāga mo Faia'koga:

A Tepola, ko te avaga a Lapitota, se pelofeta fafine kae se tokotasi foki o famasino o Isalaelu. Ne sui ne ia a Euta i te tulaga faka-famasino kae ne `kaufakatasi laua mo te takitaki kautau o Isalaelu ko Palako o faka'sao a tino Isalaelu mai i te kautau a Kanana. Se fafine e loto malosi kae ne fakatoka ne ia a te va `lei i tino o Isalaelu. I tona tulaga faka-pelofeta, a ia ko te avefekau a te Atuai i te vaitau tena. (Fam.4:4-5).

Ne kalagagina a Palako ne te Atua e auala i te pelofeta fafine ko Tepola. A te `kaufakatasi o Tepola ki te takitaki kautau ko Palako se ata fakaasi o te `kaufakatasi o te Atua ki te kautau o Isalaelu pela foki ki te takitaki.

Mea a`koga mo fakamāina ei a te mataupu:

Fakaaoga ne ata kola e taugatonu mo te tala

Fakatomuaga:

A te Atua e tausi fakamaoni ki tino kola e tali`tonu kae fakatuanaki ki a ia.

Akoakoga:

A Tepola se fafine fua tela e seai se tino e mafai o fakamoemoe ke maua mai i a ia se manumalo mo Isalaelu. A fafine foki e se masani o olo saale ki taua kae e `kilo faka-fatauvagina i tuu mo fakanofonofoga o te olaga faka-Iutaia. A Tepola ne filifiligina ne te Atua ona loa ko tena olaga tali-tonu kae fakatuanaki ki te Atua, tela ne fai i ei a ia mo Famasino o Isalaelu, kae fai foki mo pelofeta a te Atua. I te taimi o te `taua a Isalaelu mo Kanana, a ia ne fano ki te `taua kae ne tuku mai ne te Atua ki a laua mo Palako mo te kautau o Isalaelu a te manumalo ona ko tena fakatuanaki mo tena loto fakalagolago ki te Atua.

Tama`liki, e mafai foki o maua ne tatou a te manumalo manafai tatou e tali`tonu kae fakatuanaki ki te Atua, me se masaki, io me se sukega io me se a aka foki a te mea e fakafeagai mo tatou, e manumalo tatou kae taunu foki a `tou fakamoemoea manafai e fakatuaga tatou ki te Atua e pela mo Tepola.

Mea fai a Tama`liki:

- Usu pese
Fai fesili

Fuaiupu Tauloto: Salamo 37:5 “Tuku atu katoa a koe ki te Alik; fakatuanaki ki a I, kae ka fesoasoani a ia ki a koe”

Pese: Be bold, be strong io me fili mai tusi pese

Talosaga: Te Alik o te fakatuanaki, ko koe e iloa e mafai ei o maua ne matou a te fakatuanaki mo te talitonu katoatoa. Aumai ki a matou se loto fakatuanaki ki a koe i taimi katoa o motou olaga, ona ko Iesu. Amene.

ULUTALA 8: KITIONA

Pogai: Ke fesoasoani ki tama'liki ke iloa ne latou me i te manumalo e maua i te kaufakatasi mo te Atua.

Tusi Faitau: Famasino 6:11-24

Fakatokāga mo Faia'koga:

A Kitiona ko te tama a Ioasa, a tena igoa i te 'gana Epelu ko te *'kati keatea'*. E fakaigoa foki ki a Ielupaala (Fam 6:32). Ne filifiligina ne te Atua e auala i te agelu a te Aliko ke faka'sao ne ia a tino o te Atua mai te fili, tela ko tino Mitiana, tino Ameleka mo tino mai i te vao kola e fai taua ki a latou kae fakama'sei ne latou a lakau kaina kae 'fao malo a mamoe, pulumakau, mo kouti a latou (6:1-6).

A tino Mitiana ne mafua mai i te tamaliki a Apelamo ia Kitula ko Mitiana (Ken 25:1-2); ne tino maumausolo kola e faimalaga ki koga e maua ei a mouku mo vai mo fagai kae fainu a olotou manu. E 'nofo ki te Sopogala kae e seai se koga tumau mō latou.

Te kautau a Kitiona e tusa mo te tolusefululuaafe kae mai i fakatonuga a te Atua ne 'toe fua e toluselau sotia kola ne 'taki ne Kitiona o taua atu ki tino Mitiana. Te manumalo o Kitiona ne auala mai i tona talitonu ki te Atua.

Mea a'koga mo fakamāina ei a te mataupu:

Faiakoga ke 'sala se ata mo fakamaina ei a te mataupu

Fakatomuaga:

E mafai ne koe pefea o manumalo i se tafaoga io me se fai'gasukega? I te Asotapu nei, ka fakalogo'logo tatou ki te manumalo o Kitiona tela ne maua mai i te 'kaufakatasi o te Atua ki a ia.

Akoakoga:

A te manumalo i so se taumafaiga se mea tafasili i te tãua e ma'nako ki ei tatou i 'tou olaga, pela mo Kitiona ne manumalo a ia i te kaufakatasi mai o te Atua ki a ia (faitau 12). Moi fai ne seai a te Atua i ana fakamoemoega, e se mafai lele e iloa ne ia o maua a te manumalo mai tino Mitiana. Tela la, tama'liki a te loto talitonu mo te fakamoemoega ola o Kitiona me i te Atua e 'kaufakatasi mo ia tela ne manumalo ei a ia. Tela la, ke tali'tonu tatou ki te Atua me i tena 'kaufakatasi ki a koe mo au e mafai i ei ne tatou o maua a te manumalo i so se fakamoemoega tela e

fakamoemoe tatou ki ei.

Mea fai a Tama'liki:

- Kala ata kola ne fakatoka ne te faiakoga
Usu pese mo taaga

Fuaiupu Tauloto: Salamo 23:6a "E iloa ne au i tou atafai mo tou alofa e fakatasi faeloa mo au i aso katoa o toku olaga"

Pese: Fili mai tusi pese

Talosaga: Te Atua te motou tamana, fakafetai me ko toe fakamalosi mai matou me mafai ne matou o manumalo i so se taumafaiga manafai e tali'tonu katoatoa matou me i tou 'kaufakatasi mai e mafai ei ne matou o manumalo. Amene

Ulutala 9: SAMASONI

Pogai: Ke fesoasoani ki tama'liki ke iloa ne latou me i te Atua e fakamalosi ne ia a latou kola e talitonu ki a Ia.

Tusi Faitau: Famasino 16:23-31

Fakatokāga mo Faia'koga:

A te Naseli se tino ko oti ne fakatapu a tona ola mō te Atua ne ia e iloa io me ne fai ne ona matua (Num.6:1-21; 1Sam.1:1-11; Fam.13:1-17). E tolu a mea e tapu i ei a te Naseli: e tapu ma inu pia mo kava; e tapu te kati a olotou lau-ulu; e tapu foki te patele ki foitino o tino 'mate, tiga foki loa me ko te foitino mate o tona tamana. A Samasoni ne fai mo Naseli mai i te fakatonuga a te Atua (Fam 13:7).

A te atua o tino Filisitia ko Takona ko te tamana o te atua ko Paala ne aumai mai i Mesopotamia ki Sulia mo Kanana i te lua o maleniuma. A Takona se atua takutakua i Asetota (1Sam 5:1-7) kae tapuaki ki ei a tino Filisitia ko te mea ke 'lei a te 'taukai saito.

Te olaga o Samasoni ne kalagagina ne te Atua kae ne paku a te toa tenei mai i tona manako lasi ki fa'fine fapaupau o Filisitia. I te faiga tena, ne soli ei ne ia a tulaga ne fakatapu ei a ia i te katiga a tona ulu mai i faiga ma'sei a Talila te fafine Filisitia. Ne fakapuapuaga a tona olaga ne ona fili ke oko ki taimi ne 'tupu ei ona lauulu tela ne 'tule i ei ne ia a pou 'lasi o

te faletapu ke maofa. Ne `mate i ei a tino Filisitia e tokouke atu mai i tino kola ne tamate sale ne ia i aso katoa o tona olaga.

Mea a'koga mo fakamāina ei a te mataupu:

Ko te ata o Samasoni (i te tusi tapu)

Ke `sala aka ne te faiakoga ne ata kola e mafai o fesoasoani ki te `tala tenei o Samasoni.

Fakatomuaga:

Ko oi a te tagata mafi i loto i tala mai i te Tusitapu? Kai a ne mafi katoa i ei a Samasoni pena?

Akoakoga:

A Samasoni ne fakamalosi ne te Atua io me ne fai ne te Atua ke mafi auã me i a ia e talitonu ki te Atua. Ne filifiligina a Samasoni ne te Atua ke fai mo Naseli kae seki fanau mai auã me e isi se pogai, ko ia ke fai mo Famasino o Isalaelu kae ke fakasao mai ne ia a Isalaelu mai tino Filisitia. I tulaga ne fakasala ei a ia ne tino Filisitia tela ne `kamu tena ulu kae tapale ona mata, kae ko te talitonu o Samasoni ki te Atua ne tumau eiloa tela ne `talo ei a ia ki te Atua ke toe fakafoki mai aka tena malosi ko te mea ke `ta fakapalele ne ia a tino Filisitia. Tama'liki, e taua `ki a te talitonu ki te Atua me fakamalosi ne Ia tatou i tulaga o fakalavelave kola e fakafeagai mo tatou i aso takitasi. Ko te loto talitonu o Samasoni ki te Atua ne avatu i ei ne te Atua ki a ia a te malosi mo te mafi.

Mea fai a Tama'liki:

- `Kala ata
Usu Pese

Fuaiupu Tauloto: Ioane 15:7 **"Kafai e `nofo `mau koutou i a Au, ko tona uiga, so se mea e ma'nako koutou o fakatagi mai, ka maua eiloa ne koutou".**

Pese: Give me true love Jesus io me fili mai tusi pese

Talosaga: Te Atua malosi, ko tou malosi e mafai ei o maua ne matou a te malosi mo te mafai o fai so se mea ona ko te tali'tonu o matou ki a koe mo te `kaufakatasi mai o koe ki a matou. Fakamanuia mai ki a matou au fanau ona ko Iesu, Amene.

ULUTALA 10: SAMUELU

Pogai: Ke akoako a tama'liki ke iloa ne latou me i te talitonu mo te fakatuanaki ki te Atua e taunu i ei a 'tou manakõga.

Tusi Faitau: 1 Samuelu 7:5-17

Fakatokãga mo Faia'koga:

A Samuelu se famasino kae se pelofeta foki tela ne takitaki ne ia a tino Isalaelu i te otiga o pulepulega faka-famasino, kae ne fa'u ne ia a te tupu muamua e iloa o Isalaelu ko Saulo pela foki mo te lua o tupu ko Tavita. A Samuelu ko te tamaliki tagata a Elekana mo Hana kola ne tino o te gafa o Efalaima i te fakai foliki ko Lama.

A Mesepe se fakai foliki tela e lima maila i te fitu ki Matu o Ielusalema tela e takutakua i ei a tala o te ma'losi mo te 'mana o 'talo a Samuelu. Te asu o vai kae ligi ki tua mo fai te taulaga se faifaiga tela e fakaasi i ei te loto salamo; e fakamasaua foki i ei a te 'taua o te vai ki tino Isalaelu ona me õla i fenua vela kae tu pili ki te toafa.

Te 'luku tasi o Isalaelu ki Mesepe ne fakatupu ne ia a te loto 'polevale mo te manavase ki tino Filisitia, tena te pogai ne aumai i ei a latou o fai taua ki a Isalaelu. A Isalaelu ne faka'sao ne te tali'tonu o latou ki te Atua.

Mea a'koga mo fakamãina ei a te mataupu:

Ata No. 41

Se lakau mo fakatusa ki ei a te olaga 'piki mau ki te Atua, mo te olaga mavae keatea mo te Atua [Ioa 15:4-5].

Fakatomuaga:

Kafai e isi se mea e manako malosi ki ei se tamaliki, ko oi a te tino ka faka'na kae fakamoemoe a ia ki ei ke fakataunu ne ia a tona manakõga?

Akoakoga:

Kafai se tamaliki ko manako malosi ki se mea, a ia e masani loa o tagi ki tena tamana mo tena matua ke fai aka la tena manakoga, pena foki mo tamaliki ma'tua, ko se 'tagi a latou kae ko fakamolemole io me takolekole ne latou a lotou matua ke fai aka a mea kola e ma'nako a latou ki ei. A Samuelu mo tino Isalaelu ne 'talo kae fakalago'lago mo olotou loto tali'tonu kae fakatuanaki ki te Atua ke faka'sao a latou mai tino Filisitia. Ne lagona ne te Atua a te manakoga o tino Isalaelu mō se fesoasoani o Samuelu ona ko te manakoga o tino Isalaelu tela ne fakataunu ne te

Atua olotou manakoga. Tela la mo tatou tama'liki e tau mo tatou o tau-mafai o ola ite olaga talitonu mo fakatuanaki ki te Atua i tou manakoga me ko Ia fua e mafai ne ia o fakataunu ei ne Ia tou manakoga

Mea fai a Tama'liki:

- Usu pese
 - Fai fesili
- Kala ata

Pese: He is my everything....io me fili mai tusi pese

Fuaiupu Tauloto: Ioane 15:5 "Au ko te vine, ka ko koutou ko kaula. So se tino e nofo mau i a Au, mo Au i a ia, ka 'fua malosi mai a ia; se mafai ne koutou o fai se mea manafai e galo Au ia koutou"

Talosaga: Te Aliko, tuku mai ki a matou a te loto talitonu mo te fakatuanaki ki a koe, ke mafai matou o ola i loto i tou finagalo. Amene.

VAEGA 3: PELOFETA

ULUTALA 11: ELIA

Pogai: Ke akoako a tama'liki ke iloa ne latou me i te manumalo e maua ne latou mai i te faka'logo mo te fakatuanaki ki te Atua.

Tusi Faitau: 1 Tupu 18:27-40

Fakatokāga mô Faia'koga:

A Elia se 'Pelofeta o te Afi' (the Prophet of Fire) me ne 'talo ke fanaifo te afi mai i te lagi o fa'ka a tena taulaga. E seai ne fakamatalāga manino e uiga mo tena olaga, ona matua pela foki mo tena kalagagina. Ne fai a tona tofiga faka-pelofeta i taimi o tupu o Iuta ko Aapo mo Aasaia i te afa muamua o te iva senitenali.

Te uiga o te muna Kalamelu i te 'gana Epelu se 'fatoaga lakau kaina'. Ko te koga ne fai ei te fakataufaiga i te va o Elia te Pelofeta a te Atua o Isalaelu mo te 450 pelofeta a Paala me ko oi a te atua tonu. Te atua ko Paala se atua faite tela e seai se ola i ei; e se mafai ne ia o tali a talosaga a ona pelofeta io me fai se faiga ke fakamaoni i ei a tona malosi. A pelofata a Paala kola e 450 ne pa'kalaga, 'tagi kae ne katikati a olotou foitino

e pela mo faifaiga e fai ne tino tapuaki i aso kona ko te mea ke alofa mai a te lotou atua ko Paala ki a latou.

Mea a'koga mo fakamāina ei a te mataupu:

Ata

Fesili: Sea a te manumalo e 'sala ne tatou i 'tou olaga?

Tali: Ko te manumalo mai i te masei o fai a te mea tela e 'lei kae fiafia ki ei a te Atua.

Akoakoga:

A te pelofeta ko Elia ne seki matakū lele eiloa i te tupu ko Aapo io me ko te faselau limasefulu pelofeta a Paala. A Elia ne fakalagolago kae fakatuanaki ki tena Atua tela e talitonu a ia ki ei ke tuku atu ne ia a te manumalo. Ne maua ne Elia a te manumalo kae ne tamate katoa ne ia a pelofeta a Paala i te vai o Kisona.

Tama'liki, me ne a foki a faigatāga e fakafeagai mo tatou i 'tou olaga, e maua ne tatou a te manumalo i te fakalagolago mo te faka'na ki te Atua.

Mea fai a tama'liki:

Kala ata

Fuaiupu Tauloto: 1Ioane 5:4 **"Tenei te auala e mafai ei o manumalo tatou i te lalolagi, ko te tou fakatuanaki."**

Pese: We got victory in our heart io me fili mai tusi pese

Talosaga: Te Atua te motou Tamana i te lagi. Akoako mai ke iloa ne matou o fakalagolago ki tou malosi e maua ei ne matou a te manumalo i omotou olaga kae koi ōla matou i te lalolagi nei. Amene

ULUTALA 12: ELISAIA

Pogai: Ke takitaki a tama'liki ke iloa ne latou a te malosi o te 'mana o te Atua.

Tusi Faitau: 2 Tupu 2:19-22

Fakatokāga mô Faia'koga:

A Elia ko te 'Pelofeta o te Afi' me ne talo ke aumai se afi mai te lagi mo fa'ka a tena taulaga; e seai ne fakamatala manino e uiga mo tena olaga, ona matua mo tena kalagagina. Ne fai a tona tofiga faka-pelofeta i taimi o Aapo mo Aasaia i te afa muamua o te iva senetinale.

Te uiga o te muna Kalamelu i te 'gana Epelu se 'fatoga io fatoaga lakau kaina'. Ko te koga ne fai ei te fakataufaiga i te va o Elia te Pelofeta o te Atua o Isalaelu mo te 450 pelofeta a Paala me ko oi te atua tonu. Te atua ko Paala se atua faite tela e seai se ola i ei; e se mafai ne ia o tali a talosaga a ona pelofeta io me fai se faiga ke fakamaoni i ei a tona malosì. A pelofeta a Paala kola e 450 ne 'saka kae ne katikati a olotou foitino e pela mo faifaiga e fai ne tino tapuaki i aso kona ko te mea ke alofa mai te atua o latou ki a latou.

Mea a'koga mo fakamāina ei a te mataupu:

Ata

Fakamatala ke tai maina a tama'liki i te uiga o te " 'Mana o te Atua."

Fakatomuaga:

A te vai kafai e 'kona kae 'ligi ki ei ne masina, mata e 'tau o kona malosì atu io me e 'tau o magalo?

Akoakoga:

E seai se vai 'kona e mafai o faka'lei i te 'ligi atu o masima ki ei, kae ne ala o 'lei a te vai o te fakai tenei ona ko te 'mana o te Atua. E uke foki a mea i 'tou olaga e mafaufau tatou me se mafai eiloa o fai se faiga ki ei. Tama'liki, e seai se mea e se mafai ne te Atua o fai, e mafai a mea katoa mafai tatou e fakatuanaki kae talitonu ki a Ia.

Mea fai a Tama'liki:

`Lomi ata

Fesili: Nea mea faigata i 'tou olaga e manakogina ei ne tatou a te 'mana o te Atua?

Tali: Masaki, Fanoanoaga, Fesoasoani i te akoga, mo nisi mea aka foki kola e mafai o mafaufau koe ki ei.

Fuaiupu Tauloto: Luka 1:37 "E seai se mea e se mafai ne te Atua o fai."

Pese: All over the world, the spirit is moving io me fili mai tusi pese

Talosaga: Te Atua, ko tou 'mana mo tou malosi e maua ei ne matou a te fesoasoani mo te 'lei katoatoa. Fakamanuia mai ki a matou kae au-mai 'tou 'mana ke fakalagolago matou ki ei. Amene.

ULUTALA 13: PALAAMO

Pogai: Ke akoako a tama'liki ke faka'logo ki te musumusuga o te Agaga Tapu me ko te leo tena o te Atua.

Tusi Faitau: Numela 22:21-35

Fakatokāga mō Faia'koga:

A Palaamo se pelofeta tela sei se tino Iutaia kae ne vau i fenua faka-Iolitana. Se tagata e atamai i poto fakataulaitu pela foki mo te atamai i te faiga o tala (performing act). A Palamo se pelofeta tela e toka o togi tupe a tona atamai mo fai a galuega kola e teke ki te Muna a te Atua (Teu.23:4-5; Ios.13:22; 24:9-10; Nem.13:2; Mik.6:5; 2 Pet.2:15; Iut.11; Fak.2:14). Ko Palamo ne auala i ei o agasala a tino Isalaelu kola ne foki mai i te taua (Num 31:8, 16). Tiga i ei te ata masei o Palamo tena, i te mataupu o te aso nei a Palamo ko fai ne ia a mea kola e fakatonu atu ne te Atua. Te asini se manu e pela me se solofanua (horse) kae foliki ifo. Se manu e lotomalalo kae ffilemu; e masani fakaaoga sale loa ne tino mativa mo faimalaga kae ave foki i ei a olotou kope.

Mea a'koga mo fakamāina ei a te mataupu:

Ata

Fesoasoani o tai fakamaina faka'lei a mea konei ki au lua tama'liki:

- Sea a te pelofeta?
- Sea a te asini?

Fakatomuaga:

Ko te asini ne faipati mo tena pule! Kai logo aka loa koulua i se manu e faipati?

Akoakoga:

E taua ke iloa ne tatou me i te Atua e faipati mai faeloa ki a tatou mai i tena Tusi Tapu ki mea kola e 'tau o fai ne tatou i 'tou olaga. A Palaamo ne seki fakalogo ki te Atua kae ne fano e iloa ki a Palako, moi ne se lavea ne tena asini a te agelu e tu mai mo tena pelu, penei ko leva loa a ia ne

mate. A tatou foki tama'liki e 'tau eiloa o faka'logo ki te Muna a te Atua. A te Atua e faipati mai ki a tatou i aso nei e auala i tena Tusi Tapu.

Mea fai a Tama'liki:

Lomi ata

Fesili:- E iloa pefea ne tatou a te Muna a te Atua me seki iloa ne tatou o fai'tau?

Tali:- I te fakalogo'logo o tatou ki lauga i te Faletapu, fakamatalaga a 'tou matua, taimi o mafaufauga mo Akoga Asotapu.

Fesili:- Ne a nisi mea ne faipati mai a te Atua ke fai ne tatou?

Tali:- - Alofa kae mataka ki a ia

- Ava kae fakalogo ki 'tou matua

- Fakataua'lofa kae se faitaua

- (Faopopo nisi mea e mafaufau koe ki ei)

Fuaiupu Tauloto: 1 Tes 5:19 "Sa `teke ne koutou a galuega a te Agaga Tapu i loto i a koutou"

Pese: Come Holy Spirit I need you io me fili mai tusi pese

Talosaga: Te motou Atua, fakafetai mo tau Tusitapu tela ne tuku mai ne koe e faipati mai ei koe ki a matou. Akoako mai matou ke fia'fia o fakalogo'logo faeloa ki au akoakoga mai tau Muna tapu. Ona ko Keliso Iesu. Amene

ULUTALA 14: IONA

Pogai: Ke fakamasaua ki tama'liki me e isi se tau i o te talitonu mo te fakatuanaki ki te Atua.

Tusi Faitau: Iona 3:1-10

Fakatokāga mô Faia'koga:

A Nineva se fakai ko lasi a te amio ma'sei o tino i ei. A Iona ko te pelofeta ne uga ne te Atua ke fakaoko a tena fekau ki Nineva me kafai eiloa e se salamõ latou o fulitua ki olotou uiga ma'sei, a latou ka fakasala katoa. I te taimi ne folafola atu i ei ne Iona a te fekau mai i te Atua, a tino katoa ke oko ki te tupu mo olotou manu katoa ne mataka kae salamõ. Ne `pei ki gatu lautaga masae'sae kae nini olotou ulu ki lefu e

fakaasi i ei a te lotou salamō. Ne fakaliki'liki foki latou. Ne alofa a te Atua o toe fakamagalo a tino katoa i Nineva ona ko latou ko salamō. A Iona ko te tokolima o pelofeta foliki, tela ko te tamaliki tagata a Amitai tela ne galue i Isalaelu i te valu o senitenali.

A Nineva ko te laumua o Asulia; se fakai lasi i Mesopotamia; kae tu ki te feitu ki te saegala o te vaitafe ko te Taikelise (*Tigris*).

Te pei ki gatu lautaga masae'sae kae nini a ulu ki lefu kae fakaliki'liki se faifaiga tela e fai ne tino Isalaelu mo fakaasi a olotou loto salamo i mua o te Atua e uiga mo agasala a latou.

Mea a'koga mo fakamāina ei a te mataupu:

Ata

Toe fakamatala faka'lei a te uiga o te fakalilikiki, te 'pei o tino ki gatu lautaga masae'sae mo te nini o ulu ki lefu se tuu faka-Iutaia e fakaasi i ei a te loto salamō patonu.

Fakatomuaga:

I te fakalogo o te tagata e tokotasi, ne maua ei ne te fakai katoa a te loto salamo mo te tau'i 'lei.

Akoakoga:

Ona ko Iesu ne fakalogo ki te Atua ke fano a Ia o fakaoko tena fekau ki Nineva, ne ala ei a tino katoa o Nineva o sala'mo, fulitua ki olotou uiga ma'sei, kae fakatuanaki mo te loto talitonu ki te Atua. Ne maua ne latou a te tau'i 'lei tela ko te fakamagaloga o olotou agasala. Tama'liki, e isi se tau'i 'lei kae fakafiafia loto e maua ne tatou mai i te Atua mafai tatou e tali'tonu patonu eiloa ki a Ia. Ko 'tou agasala katoa ka fakamagalo i te toto o tena tama fagasele ko Iesu Keliso.

Mea fai a Tama'liki:

`Lomi ata

Fakafesilisili e uiga mo te tala:

Fuaiupu Tauloto: Ioane 14:12a "Au e muna tonu atu ki a koutou: so se tino e talitonu ki a Au, ka ka fai foki ne ia galuega kola e fai ne Au".

Pese: "Obedience is the very best way" io me fili mai tusi pese

Talosaga: Te motou Atua alofa, fakamanuia mai matou i te aso tenei kae ke fai matou mo tama'liki tali'tonu ki a koe kae fakalogo ki tau muna i aso katoa e ola ei matou. Amene.

VAEGA 4: TUPU

ULUTALA 15: SAULO

Pogai: Ke akoako ki tama'liki ke iloa ne latou me i te Atua e filifili ne Ia a tino ki tiute mo tulaga kese'kese.

Tusi Faitau: 1 Samuelu 10:17-27

Fakatokāga mô Faia'koga:

A Saulo ko fai mo Tupu: A Saulo ko te tama tagata a Kiso tela se tagata mai te matakaiga a Peniamina, i te kaiga o Matila kae e nofo i Kipea (1Sam.8.1-22). Mesepea i te `gana Epelu ko te Olo lamalama (watchtower). E lima a fakai io me ko koga i te Tusi Tapu e fakaigoa ki a Mesepea: 1. Mesepea tela ko te koga fenua ki Matu o Palesitaina (Ios.11:3, 8). 2. Ko Mesepea i Kileata – te koga ne fai i ei te feagaiga a Lapana mo Iakopo (Ken 31:49). E tenei foki te koga ne fai i ei te feagaiga a te Atua mo Isalaelu (Fam 11:11). 3. Mesepea i Iuta tela se manafa ne tuku ki te Matakaiga o Iuta (Ios 15:38). 4. Mesepea o Moapi (1Sam 22:3). 5. Mesepea o Peniamina: ko te koga me fakatasi ei a matakaiga o Isalaelu i te siki taua atu ki a Kileata o Peniamina (Fam 20:1-48). Ko te koga ne fakamasino i ei ne Samuelu a tino Isalaelu (1Sam 7:16-17). Ne fai ne te Tupu ko Aasa mo fai se olo malosi i te taua a Isalaelu mo Iuta (1Tup 15:17-22). Te olo o Matakaiga mo kaiga takitasi i mua o te Atua (f20-21) se faifaiga tela ne fai foki ne Iosua (Ios 7:16-18) kae e seai se fakamatalaga manino e maua mo te faifaiga tena. I taimi o te malaga o Isalaelu mai i Aikupito, a te Atua ne fakaasi a tona loto ki a Isalaelu e auala i te Efota tela e piki i ei a te Ulima mo te Tumema kae e tu i te ufi fatafata o te gatu o te Faitaulaga (Eso.28:15, 30).

Mea a'koga mo fakamāina ei a te mataupu:

Ata

Fakatomuaga:

Kai matea ne koulua tama'liki te tupu io me ko te ata o te tupu? A te tala

a tatou i te Asotapu tenei ko te tala o te tupu muamua o Isalaelu ko Saulo.

Akoakoga:

Tama'liki, A te Atua ne filifili kae kalaga ne Ia a Saulo ke fai mo tupu muamua o Isalaelu. E pena foki i aso nei, a te Atua e tumau a tena filifiliga mo tena pulega i 'tou olaga takitokotasi, tela la, e 'tau mo tatou o fakalago'lago ki te Atua ki tena fakamanuiaga i 'tou fakamoemoega ko te mea ke fakataunu ne ia mo te manuia.

Mea fai a Tama'liki:

Usu pese

Fuaiupu Tauloto: Loma 8:28 "I te mea e iloa ne tatou i te Atua e ga'lua fakatasi mo tino kola e a'lofa ki a Ia, ko latou e iloa kola ne kalagagina mo tena galuega"

Pese: I will make you fishers of men io me fili mai tusi pese

Talosaga: Fakafetai te motou tamana faka-te-lagi mo te aso tenei ko aulia manuia ne matou au fanau. Matou e 'talo ke fakamanuia ne koe a takitaki o te malo o Tuvalu ke oko tou fakamanuiaga ki te tupu fafine o Peletania. Talo atu matou ia Iesu Keliso te motou Aliko mo te motou fakaola. Amene

ULUTALA 16: TAVITA.

Pogai: Ke fesoasoani ki tama'liki ke tali'tonu mo te fakamaoni ki te Atua e pela mo te tupu ko Tavita.

Tusi Faitau: 2 Samuelu 2:1-11

Fakatokāga mô Faia'koga:

A te tusi faitau e fakamatala mai ei a te tala o te tupu ko Tavita. A Tavita te tama tagata toekimuli a Iese, mai te matakaiga o Iuta. A te fakai o Tavita ko Peteleema. A Tavita ne filifiligina ne te Atua ke fai a ia mo tupu o Isalaelu, ka ko tolusefulu ona tausaga. Koi tuai o fai a ia mo tupu o Isalaelu katoa ne fai a Tavita mo tupu o Iuta kae ne nofo i Hepelona i tausaga e fitu mo te afa. A Tavita se tupu kae se takitaki foki o te kautau

o Isalaelu . Ne taua atu ki fa'kai o Iuta pela mo Hepelona. Mai mua o te fakasopoga a Tavita mo fai te tupu o Isalaelu katoa, ne taua atu ki Ielusalema. Ne taua mo te kau Iepuse kola e 'nofo i Ielusalema(2 Sam.5.6-7). A Tavita ne toe fakasopo mo fai te tupu o Isalaelu mo Iuta (2 Sam.5.1-3). A te tupu ko Tavita ne fai mo tupu i tausaga e fasefulu. Tavita ko te lua o tupu o Isalaelu tela ne talitonu kae ola fakalagolago ki te Atua. Ne fiafia te Atua kia Tavita me talitonu kae fakalagolago a Ia ki te Atua.

Mea a'koga mo fakamāina ei a te mataupu:

Ata o te tupu
Vitio

Fakatomuaga:

E isi se tamaliki e iloa ne Ia te tala o Tavita? io me so se tupu?. I te aso tapu tenei ka fakalogo'logo tatou ki te tala o Tavita. A Tavita se tupu takutakua tela ne filifili ne te Atua ke fai mo tupu o Isalaelu.

Akoakoga:

Mai te tala tela ko oti ne fakalogo'logo tatou ki ei, e lavea me i te Atua ne filifili ne ia a Tavita ke fai mo tupu o Isalaelu. E lavea foki me i te Atua e fiafia ki a Tavita. E alofa te Atua ki a Tavita kae ne tuku faeloa ne te Atua a te manumalo ki ei. Mo tatou tama'liki, e pena foki tatou, a te Atua e tumau o fesoasoani kia tatou ke maua ne tatou te manumalo. E se gata fua i ei ke masaua ne tatou me i te Atua e filifili ne Ia a tino 'lei kae fakatuanaki ki tulaga maluga. Se taumate a te Atua ne filifili ne Ia a Tavita ona ko tena fakatuanki. A Tavita i taimi katoa ne fesili ki te Atua koi tuai o fakataunu ne ia tena loto. Ke pena foki tatou fanau ke fai tatou pela mo Tavita

Mea fai a Tama'liki:

Usu pese

Fuaiupu Tauloto: Salamo 72:1 **Te Atua, akoako te tupu ke fakamasino ne ia tino ki tau amiotonu; Kaufakatasi koe mo ia i tau fakamasinoga tonu.**

Pese: It`s no longer I that liveth io me fili mai tusi pese

Talosaga: Fakafetai te Atua mo Iesu Keliso tela ko Ia ko te motou tupu tela ne tuku mai ne koe ke talitonu kae fakatuanaki matou ki ei.

Amene.

ULUTALA 17: SOLOMONA

Pogai: Ke fesoasoani ki tama'liki ke iloa ne latou a te tau'i a te Atua ki takitaki o Isalaelu ona ko te lotou fakatuanaki ki a Ia.

Tusi Faitau: 1Tupu 3:5-11

Fakatokāga mô Faia'koga:

A Solomona tela e fakaigoa foki ki a Ietitaia, tela a tena uiga e alofa ki ei te Atua', (2 Sam.12.24-25) ko te tama tagata o Tavita i a Patisepa, kae takutakua i te poto.

A Koga Maluga kola e sunu i ei a taulaga a Isalaelu ne koga ne tapuaki ki ei a tino Kanana kae nei ko fakaaoga mo fai a tapuakiga ki te Atua. A koga konei e masani o tu i luga mauga fo'liki kae ati i ei a fatafaitaulaga kola ne fatu io me ne kaupapa ko oti ne faite fakalei mo sunu a manu ki te Atua. A Kipeona se fakai foliki tela e lima mo te afa maila ki te feitu ki Matu-Togala o Ielusalema; kae e tu i kona te fatafaitaulaga takutakua tela e fano sale ki ei a Solomona o tapuaki ki te Atua. Te aofaki o mamoe kola ko oti ne `sunu ne Solomona mo fai ana taulaga e fakaasi i ei te uke o taimi e fano sale a ia o tapuaki ki te Atua.

Te fakaasi mai a te Aliko ki a Solomona i te moemiti se faifaiga tela e fakaaoga malosia ne tusi tala o Tusi Tapu mo fakamaina me i te Atua ne fakaasi mai loa a Ia ne Ia loa ki tino, kae ko te auala foki o te Atua e fakaasi a mea ka tupu i se taimi mai mua: (Ken 28:12; 37; Teu.13:2-6; Iele.27:9-10; Ioe.2:28).

A Solomona te tama tagata o Tavita ia Patisepa. A te sua igoa o Solomona tela e manako ki ei te Aliko ke fakaigoa ki ei ko Ietitaia, tena uiga 'e alofa ki ei te Atua'. (2 Sam.12.24 & 25) A Solomona te tupu takutakua i te poto. Ne 'talo Solomona ki te Atua ke tuku atu te poto ki a ia, ke 'taki ei ne ia te fanauga o Isalaelu. Ne fialia te Aliko ki te fakamolemole a Solomona kae ne maua e iloa ne Solomona a te poto (fuaiupu e 10&11). A Solomona te tupu e talitonu kae fakatuanaki ki te Atua. I te taimi koi tuai o faite te Faletapu a tino Isalaelu e masani o ofo atu olotou taulaga ki te Atua i luga i fatafaitaulaga. Ne takitaki ne ia a tino ke fialia o tapuaki ki te Atua. Ne olo a Solomona mo ona kautau ki Kipeona o ofo atu olotou taulaga ki te Atua.

A te tupu ko Solomona ne faite ne ia te Faletapu a te Atua. Te Faletapu a te Atua ne faipati ki ei a Tavita, kae ne faite ne Solomona (1 Tupu 6.1-

14)

Mea a'koga mo fakamāina ei a te mataupu:

Faiakoga ke fakatoka ne ia a ata kola e tau tonu mo te mataupu.

Fakatomuaga:

Se a te aoga o te poto ki a tatou e tama'liki? A te Ulutala a tatou i te Asotapu tenei' Ko te tala i te tupu ko Solomona.

Akoakoga:

Mai te tala a tatou tama'liki e fakaasi mai me i te Atua e alofa ki tino e tali'tonu ki Ia. A Solomona mai tafa o tena tulaga faka takitaki tela ko ia te tupu o Isalaelu, ne maua ne ia te poto mai te Atua. Ne tali atu a te Atua ki te talosaga a Solomona tela ne tuku katoatoa ei ne te Atua te poto ki ei. Ke pena tatou tama'liki, ke ola talitonu tatou ki te Atua kae ke `talo tatou ki te Atua ke maua ne tatou a te poto mo te atamai, ke mafai ne tatou o maua a tusaga mo galuega `lei faka-takitaki i te lu'manai.

Mea fai a Tama'liki:

Usu Pese

Kala ata

Fuaiupu Tauloto: Faataoto 3:5 **"Talitonu ki te Aliko mo tou loto katoa. Sa fakalagolago lele e iloa ki tou iloa."**

Pese: He`s able, he`s able io me fili mai tusi pese

Talosaga: Fakafetai te Atua mo tou alofa kae maise te poto ne tuku ne koe ki takitaki. Talo atu matou ke pena o tuku mai foki kia matou te poto ke mafai ne matou o iloa a tou kanoloto mo matou. Amene.

ULUTALA 18: LEOPOAMO

Pogai: Ke fesoasoani ki tama'liki ke iloa ne latou me i te Atua e tumau o fesoasoani ki a latou kola e tali'tonu kae a'lofa fakamaoni ki a Ia.

Tusi Faitau: 2 Nofoaiga Tupu 12:5-8

Fakatokāga mô Faia'koga:

A Leopoamo ko te tamaliki tagata a Solomona i tena avaga ko Naama te pulinise o Amoli kae ne sui ne ia a tona tamana i te matega o tona tamana (1Tupu 14:21). A Leopoamo ko te 'toe tupu o te malo o Isalaelu kae seki mavae-lua; a ko ia foki ko te tupu muamua o Iuta i te otiga ne mavae-lua a te malo. A te malo o Isalaelu ne fakatu a tona laumua i Samalia a ko Iuta ne fakatu a tona laumua i Ielusalema.

A Sesaka ko te tupu o Aikupito tela ne tausi ne ia a Ielopoamo kae koi tuai o fai mo tupu o Isalaelu. Ne fai taua atu a te tupu ko Sesaka ki Palestina a ko lima tausaga ne fai ei a Leopoamo mo tupu o Iuta (1Tupu 14:25-26).

Ne fultua a Iuta ki te Aliko i te tapuaki atu o latou ki a Asaila (Paala) a ko Leopoamo ko te tupu o Iuta (1Tupu.14:22-24). A te salamo i te tala tenei ko te fakapatonu ne tino i a latou ko se kae e tonu a te Atua (12:6)

Mea a'koga mo fakamāina ei a te mataupu:

Ata

Fakatomuaga:

Kafai se tamaliki e fai atu ne ia se mea 'se ki a koe, mata koe e fiafia ki te tamaliki tena?

Akoakoga:

A te Atua e tumau faeloa a tena alofa mo tena aga'lei ki tino katoa kola e tali'tonu ki a Ia, faitalia me pefea a te 'se atu o tatou ki a Ia i nisi taimi o 'tou olaga, kae e talia fiafia e iloa ne Ia tatou manafai e toe foki atu tatou ki a Ia i te loto salamô mo te tali'tonu ki a Ia e pela e iloa mo tena fakatokāga ki a Leopoamo mo tino o Iuta i te tala a tatou.

Mea fai a Tama'liki:

- Usu pese

Talo

Fuaiupu Tauloto: Ielemia 17:7 "Ka fakamanuia ne Au a te tino tela e talitonu mai ki a Au."

Pese: In time like this I need a savior io me fili mai tusi pese

Talosaga: Te Atua te motou tamana alofa, fakafetai lasi mo tou alofa tumau mai mo matou. Fesoasoani mai ki omotou olaga, ke fai ma-

tou mo tino e a'lofa kae talitonu ki a koe mo te fakamaoni i aso katoa e
ola ei matou, ona ko Iesu. Amene.

ULUTALA 19: IOSIA

Pogai: Ke fesoasoani ki tama'liki ke iloa ne latou me i te Atua e filifili foki
ne Ia a tino tali'tonu kola koi talavou ke fai mo takitaki.

Tusi Faitau: 2 Tupu 22:1-20

Fakatokāga mō Faia'koga:

A te igoa o Iosia te tupu o Iuta i te 'gana Epelu e fakauiga ki te "Atua e
tuku mai; e faka'lei; e aumai ne ia" (God gives; cures; bring forth). Ko te
tama a te tupu ko Amoni mo Ietita kae ne fai mo tupu a ko valu a tau-
saga o tena olaga.

A te tusi tela ne maua ne te Faitaulaga Sili ko te tusi o Tulafono tela ko
te kano-loto o te Tusi o Teutelenome a ko mataupu 12-26. E tenei te tusi
tela ne fakavae ki ei a atikega o te olaga tapuaki i Iuta i taimi o Iosia.

A te tusi faitau e fakamatala a te tala o Iosia te tupu o Iuta. A te matua o
Iosia ko Ietita, te tama fafine a Ataia mai te fakai o Posikata. A Iosia ne
fai a Ia mo tupu ka koi valu ona tausaga. A Iosia ne fai ne ia a mea e
fiafia ki ei te Aliko. Ne tautali a ia i auala o tena tupuna ko Tavita. Ne
tausaki fakamaoni ki tulafono a te Aliko. Mai tusaga ne fai ne Iosia mo tino
o Iuta. A mea ne fai ne Iosia i taimi o tena nofoaiga. Ne toe faite ne ia a
mea ma'sei o te faletapu (2 Tup 22.4-7). Ne fakagata ne Iosia a ta-
puakiga fapaupau.(2 Tup 23.1-9) Ko toe maua a tusi o te tulafono i te
faletapu (2 Tup.22.8 -23.3) Ne fakafou ne ia a faifaiga mo tulafono i
Matu (2 Tup 23.4-14). Ne fakamafuli foki ne ia a faifaiga mo tulafono i
Saute 2Tupu 23.15-20a). Ne fakafou ne ia a faifaiga o te Paseka (2 Tup
23.21-23). A te Atua ne kaufakatasi mo te Atua i tausaga o tena no-
foaiga. E ui e iloa ne filifili ne te Atua a Iosia koi tamaliki kae e tumau o
fesoasoani te te Aliko te Atua ki ei.

Mea akoga mo fakamaina ei a te mataupu:

Faiakoga ke fakaaoga te Ata o te Tupu ko Iosia ke fakaaasi ki tamaliki a te
fakafoofogina o te tupu foliki ko Iosia

Fakatomuaga:

Kai lavea ne koulua tama'liki te Ata o te tupu foliki penei mo Iosia? I te
asotapu tenei ka fakalogo'logo tatou ki te tala o Iosia te tupu o Iuta. A

Iosia ne fai a Ia mo tupu o Iuta kae koi valu ona tausaga.

Akoakoga:

Se tala fakaofogina i tala fakasolopito i loto i te tusi tapu, me i te tupu tenei ne fai mo tupu kae koi pena tena matua mo koulua tama'liki. Tama'liki, e tau ke ola talitonu ki te Atua, kae ke tausiusi ki akoakoga a otou matua. Me kafai e tausi ne koulua a akoakoga o oulua matua ka manuia o'tou olaga pela mo Iosia. Ka fai koulua mo takitaki o tino, ia se gata fua i ei ka filifiligina koulua ki tulaga mo tofi maluga i aso fakamuli.

Mea fai a Tama'liki:

- Usu Pese Tama'liki mo te Faiakoga
Kala ata

Fuaiupu Tauloto: Iel:4-5 Muna a te Aliko ki a au," Ne filifili ne Au a koe kae seki avatu ei ne Au te ola ki a koe; koi tuai koe o fanau kae ko leva ne filifili ne Au a koe ke fai mo pelofeta ki malo

Pese: Sweep over my Soul, Sweep over my Soul io me fili mai tusi pese

Talosaga: Fakafeta te motou Atua mo te ola te malosi e tumau kae mautakitaki i luga ia matou. E talo atu matou ke fesoasoani mai ki a matou ke mafai ne matou o a'lofa atu kia koe te motou Aliko. I te igoa loa o Iesu Keliso e talo atu ei matou nei. Amene

VAEGA 5: FAITAILAGA

ULUTALA 20: ALONA

Pogai: Ke fesoasoani ki tama'liki ke fai a olou galuega mo te loto talitonu ki te Atua

Tusi Faitau: Esoto 28:1-14

Fakatokāga mô Faia'koga:

A Alona ko te taina o Mose tela ne fili ne te Atua mo fai te 'failauga', 'pelofeta' io me se 'tukumuna' a Mose (Eso 4: 14-16; 7: 1). Ne fai a Alona mo Faitaulaga muamua loa a te Atua (28:1) kae fakamuli ifo, ne ofa ne ia te Feagaiga tela ne fai i te va o te Atua mo Isalaelu i te faitega

ne ia te pulumakau aulo ke tapuaki ki ei a tino Isalaelu (32: 2-4). Ne seki oko a tena Malaga ki te Fenua ne tauto ne te Atua ki olotou tua (Num 20: 12) me ne mate a ia i te Mauga ko Holo (20: 28).

A gatu o te Faitaulaga e faite loa mo pei i te faiga o tapuakiga kae faka'kese foki i ei a faitaulaga mo tino tapuaki. E fakatino foki ne gatu a te gali mo te 'mana tela ko te iloga mo te tulaga o te galuega faka-faitaulaga.

Te Efota ko te ufi-fatafata tela e suisui faka-galigali kae sai i feitu katoa ki te gatu loa o te faitaulaga. A te Ulima mo te Tumema ne fatu taua kola e tali mai i ei a te Atua ki te 'ao' mo te 'ikai' ki fesili a faitaulaga e uiga mo manakoga o te fenua.

A Alona ko te taina o Mose tela ne fili ne te Atua mo fai te 'failauga', 'pelofeta' io me se 'tukumuna' a Mose (Esoto 4: 14-16; 7: 1). Ko Alona mo Hulo ne taofi ne laua a lima o Mose i taimi ne vale ei i te sisiga ki luga ke manumalo a Isalaelu i te taua mo Ameleka (17: 12). Ne fai a Alona mo Faitaulaga muamua loa a te Atua (28:1) kae fakamuli ifo, ne ofa ne ia te Feagaiga tela ne fai i te va o te Atua mo Isalaelu i te faitega ne ia te pulumakau aulo ke tapuaki ki ei a tino Isalaelu (32: 2-4). Ne seki oko a tena Malaga ki te Fenua ne tauto ne te Atua ki olotou tua (Numela 20: 12) me ne mate a ia i te Mauga ko Holo (20: 28).

Mea a'koga mo fakamāina ei a te mataupu:

Se ata o te pulumakau aulo tela e tapuaki ki ei tino Isalaelu ne faite ne Alona.

Fakatomuaga:

E isi ne tino i loto i te Tusitapu ne tapuaki ki se pulumakau faite e pela me ko te lotou atua, ko oti koutou ne 'logo i te tala tena?

Akoakoga:

A Alona ne filifili muamua ne te Atua ke fai mo failauga a Mose kae fakamuli ifo ne toe fili ne te Atua ke fai mo faitaulaga i tona Fale Tapu. E matea 'lei ne tatou te ata o te tino fakatuanaki ki te Atua mai i tusaga e fai ne ia i te galuega a te Aliko.

A gatu kola ne fakatoka mo pei a Alona e pela mo te fakatonuga a te Atua, se faifaiga e fakamatea ei te taua o te olaga tavini ki te Atua mo te loto talitonu (28: 3-4). E akoako mai ko tatou ke fai a tou galuega i aso takitasi mo te fakatuanaki ki te Atua. Me kafai a tatou e fai pena, ka so-losolo 'lei a tou galuega kae ka fakamaoni a tatou o galue malos; faitalia

me galue a tatou mo te malo, kamupane, io me ko te Fono Pule, ka fai a tou galuega ki te tulaga tafasili i te lei tela e mafai ne tatou o fai.

Mea fai a Tama'liki:

Tuku ke lomi te ata ote pulumakau aulo tela ne faite ne Alona ke tapuaki ki ei tino Isalaelu,

Fuaiupu Tauloto: Ielemia 1:8a **Sa mataku i a latou, me i a Au e fakatasi atu ki a koe o puipui koe.**

Pese: Jesus is the way the truth and the life io me fili mai tusi pese

Talosaga: Iesu mai ki a matou se loto talitonu ki a koe ka ke fakatua-naki foki ki a koe mo te fakamaoni. Amene.

ULUTALA 21: ELI

Pogai: Ke akoako a tama'liki ke fakamaoni ki te Aliko kae fai a te mea tonu i taimi katoa.

Tusi Faitau: 1 Samuelu 2: 12-17

Fakatokāga mô Faia'koga:

Te uiga o te igoa o Eli ko 'apai ki luga'. A ia se faitaulaga kae se famasino foki o Isalaelu. Te olaga o Eli e lavea gofie i ana faiga mo uiga penei: E atafai ki tama'liki (1Sam 3: 6), kae talia ne ia a fakaasiga a te Aliko (1Sam 3: 18). Ne manava'se malosia a te toaina i te avega ne takitaki o te Kautau te Pusa o te Feagaiga (1Samuelu 4: 13).

A Eli ne seki fakamaoni o fai faka'lei a tona tofiga (1Samuelu 2: 29), kae e se akoako kae e se 'liko foki ne ia a amioga ma'sei ana tama'liki ta'gata e fai ki te Aliko (1Samuelu 3: 13). Ne mate a Eli i te sigaga kae fati mo tona ua i te logoga i te Pusa o te Feagaiga ko oti ne ave ne tino Filisitia mene fakatakavale ne latou te kautau a Isalaelu (1Sam 4: 17-18).

Te uiga o te igoa o Eli ko 'apai ki luga'. A ia se faitaulaga kae se famasino foki o Isalaelu. Te olaga o Eli e lavea gofie i ana faiga mo uiga penei: E atafai ki tama'liki (1Samuelu 3: 6), kae talia ne ia a fakaasiga a te Aliko (1Samuelu 3: 18). Ne manava'se malosia a te toaina i te avega ne takitaki o te Kautau te Pusa o te Feagaiga (1Samuelu 4: 13).

A Eli ne seki fakamaoni o fai faka'lei a tona tofiga (1Samuelu 2: 29), kae e se akoako kae e se 'liki foki ne ia a amioga ma'sei ana tama'liki ta'gata e fai ki te Aliko (1Samuelu 3: 13). Ne mate a Eli i te sigaga kae fati mo tona ua i te logoga i te Pusa o te Feagaiga ko oti ne ave ne tino Filisitia me ne fakatakavale ne latou te kautau a Isalaelu (1Samuelu 4: 17-18).

Mea a'koga mo fakamāina ei a te mataupu:

Fakaaoga te ata i te Tusitapu laufatua e 137 i te feagaiga mua.

Fakatomuaga:

E iloa ne koutou me ko oi te tino e tausi ne ia tou Falesa?

Akoakoga:

A tama'liki ta'gata a Eli kola ne faitaulaga i te Faletapu i Sailo ne fai ne laua a uiga kaimanako kola e se tonu i mua o te Atua. A laua e se saga lele e iloa ki tulafono mo fakanofoga kola e tau o tautali ki ei a faitaulaga. I te sua feitu, A Eli e se saga foki o akoako io me fakatonu a faifaiga 'se konei e fai ne ana tama'liki ta'gata. Ne 'mate katoa a tama'liki ta'gata konei i te taua mo te kau Filisitia e pela mo te mea e loto ki ei a te Atua. Ko akoako mai a tala konei ki a tatou me se mea tafasili i te 'lei mo te 'gali ko te talia ne tatou a muna akoako a tou tamana mo tou matua. Ka faka'logo a tatou ki a laua mo te loto alofa, ka mafai ei ne tatou o fakamaoni ki akoakoga a te Atua kae fai foki ne tatou te mea tonu i aso katoa.

Mea fai a Tama'liki:

Tama'liki ke 'lomi te ata o te Falesa.

Fuaiupu Tauloto: Fataoto 21:3 Fai te mea tonu kae 'lei, a te Aliko e Fiafia ki te mea tena I lo te aumai o taulaga kia ia

Pese: Trust and obey io me fili mai tusi pese

Talosaga: Te Atua fakamolemole fesoasoani mai kia matou kae tuku mai se loto fakalogo ke fai matou mo tama'liki 'lei kae fiafia koe ki ei.

ULUTALA 22: ESELA

Pogai: Ke fakamāina faka'lei ki tama'iki me i takitaki 'lei e 'tau eiloa o tali'tonu ki te Atua i taimi katoa.

Tusi Faitau: Esela 7:7-28

Fakatokāga mô Faia'koga:

A te uiga o te igoa o Esela ko te fesoasoani. A ia se takitaki takutakua ona ko te fakataua nei i tona loto a te tauloto mo te sukesuke ki te Muna a te Atua. E tena te pogai ne lasi ei a tona poto mo tena malamalama i te Muna o Tulafono (Esela 7: 10-11). A Esela e fiafia o faitau kae fakamatala ne ia te Tulafono ki tino (Nem 8: 2-8). A ia se tagata ko fakatalitonugina (Ese 7: 25), se tagata foki e mafuta mo tona Atua i tona olaga talo (8: 21; 10: 1), se tagata fakatuanaki (8: 22), e se fakataua ne ia a tona olaga io me ko ona manakoga i te saga o fesoasoani ki te fakalei-akega o tulaga se i tino kola ne takitaki mai ne ia (10: 6). A Esela ne galue o atiake te olaga fou mo tino o tena fenua [Reformer] (10: 2-5).

Mea a'koga mo fakamāina ei a te mataupu:

Kafai e maua se ata o te tala o Esela ko pei se vitio.

Fakatomuaga:

E isi se tamaliki e iloa ne ia me ko oi te Loia o te malo? Te tala o te aso tenei e fai ki te tino pela me se loia e iloa katoa ne ia a tulafono kola e fiafia ki ei te Atua. Ka ko Ia foki ko fesoasoani ki so se tino.

Akoakoga:

Te faitaulaga ko Esela ne takitaki ne ia te kaumalaga a Isalaelu mai i Paelonia o foki ki Ielusalema mai te saolotoga ne maua ne latou mai i te Tupu o Pelesia ko Aletaseta, Ne fakamanuia ne te Atua a Esela tela ne tuku ei ne te tupu o Pelesia so se mea e manako a ia ki ei (7: 7; 21-22). Ne fakaaoga foki ne Esela te poto ne tuku atu ne te Atua ki a ia mo pulupe faka'lei a tino kola ne taki ne ia ki Ielusalema.

E lavea i te olaga o Esela te ata o te takitaki tela e talitonu kae fakatuaga ki te Atua i taimi katoa. E tenei te ata e tau o faka-akoako a tatou ki ei. Ka fakamanuiagina a tou olaga 'ma penei a tatou mo Esela i te talitonu ki te Atua i taimi katoa.

Mea fai a Tama'liki:

Ka fai e maua te ata video ko pei kae fakamaina ne te faiakoga ki tama'liki.

Fuaiupu Tauloto: Epelu 13:6e A te Aliko ko toku fesoasoani, ko se matakau au! Ko se matakau au! Ki so se mea e fai mai ne se tino ki a au.

Pese: Oh! please let me walk with you Jesus...io me fili mai tusi pese

Talosaga: Iesu fakafetai mo te tulafono ko oti ne akoako mai ne koe ke tau'tali matou ki ei kae ke fesoasoani foki matou ki so se tino e manakogina omotou fesoasoani. Amene.

ULUTALA 23: SIMEONA

Pogai: Ke akoako a tama'liki me i te tali'tonu ki te Atua e maua mai ei se filemu.

Tusi Faitau: Luka 2:25-35

Fakatokāga mô Faia'koga:

E molimau mai ne te Tusi Tala ko Luka ia Simeona se tino 'lei kae matakau ki te Atua. A te matakau ki te Atua e fakauiga i konei ki te tausi fakamaoni ne tino a Tulafono; E talitonu ki folafolaga a te Atua kae nofo fakatalitali ki te Fakaolataga a te Aliko; Se tino e mafuta mo te Agaga Tapu kae ne takitaki foki ne te Agaga Tapu ke lavea ne ia te Fakaola ko Iesu i te Faletapu. Ne apai ne ia a Iesu ki ona lima kae siki tena fakafetai ki te Atua me ko oti ne tausi ne ia tena feagaiga.

E molimau mai ne te Tusi Tala ko Luka ia Simeona se tino 'lei kae matakau ki te Atua. A te matakau ki te Atua e fakauiga i konei ki te tausi fakamaoni ne ia a Tulafono; E talitonu ki folafolaga a te Atua kae nofo fakatalitali ki te fakaolataga a te Aliko; Se tino e mafuta mo te Agaga Tapu kae ne takitaki foki ne te Agaga Tapu ke lavea ne ia te Fakaola ko Iesu i te Faletapu. Ne apai ne ia a Iesu ki ona lima kae siki tena fakafetai ki te Atua me ko oti ne tausi ne ia tena feagaiga.

Mea a'koga mo fakamāina ei a te mataupu:

Ata No.56

Fakatomuaga:

E isi se tino matua io me se toeaina e iloa ne koutou e kivi ana mata?

Akoakoga:

A Simeona se tagata talitonu ki te Atua kae ola mafuta mo te Agaga Tapu kae ne nofo fakatalitali ki te aso e fakasaoloto ei a Isalaelu i pulega a malo pela mo Loma e auala i te oko mai o te Mesia. Mai i tona olaga talitonu ki te Atua mo ana folafola ne fakaasi atu ne te Agaga Tapu me ka kilo a ona mata ki te Fakaola o Isalaelu.

Mai i te takitakiga a te Agaga Tapu ne lavea kae apai ne ia a Iesu ki ona lima tela ne oko ifo ei te fiafia mo te filemu ki tona loto, kae ne siki a tena fakafetai ki te Atua me ko oti ne lavea ne ia a tona Fakaola. "... *tuku atu tau tavini ke fanatu mo te filemu, me ko oti ne lavea ne au tau Fakaolataga.*"

A tino e talitonu ki te Atua e penei mo Simeona ka maua ne latou te loto toka mo te filemu me talitonu ki folafolaga katoa a te Alik.

Mea fai a Tama'liki:

Ke fakatu te tala o Simeona faka-koniseti.

Fuaiupu Tauloto: Luka 2:29 " Te Alik, ko oti ne tausi ne koe tau fea-gaiga, kae ke tuku atu tau tavini ke fanatu mo te filemu.

Pese: I lift my hands up unto thy name...io me fili mai tusi pese

Talosaga: Iesu ko ofo atu omotou ola ke pule koe kae ke takitaki matou ki te ola se gata mai. Amene.

ULUTALA 24: SAKALIA

Pogai: Ke akoako a tama'liki ke tali'tonu mo te loto katoatoa ki akoakoga a te Alik i taimi katoa.

Tusi Faitau: Luka 1:5-25

Fakatokāga mô Faia'koga:

A Helota i te tala tenei e fai pela me ko Helota te Sili (Herod the Great) tela ne fakasopo ne Loma ke fai mo tupu i Palesitaina i te 40 BC kae ne

mate i te 4 BC. A faitaulaga e fakasolosolo o fai o olotou tofi i te Faletapu e pela mo te fakasologa tela ko oti ne vae ki ei a latou. A vaega konei e 24 e fakasino ki tino kola ne fakamau a olotou igoa i te fakasologa tela ne fakamau ne Alona te Faitaulaga Sili (1Nofoaiga Tupu 24: 7-18). A Sakalia ne vau mai te fakasologa o te tokovalu tama'liki a Alona ko Avia. Tela la, ko tu tonu ki a ia te vili tela ko te faifaiga e fili ei te faitaulaga ka tu i te Faletapu e sui ne ia te vaega tela e kau ei a ia.

Te uiga o te igoa o Sakalia ko "*E masaua ne te Alik*" ne avaga mo Elisapeta tela Elisapeta ne vau mai te kaiga faitaulaga foki, a ko ia e se fanau e pela mo Sala, Lepeka, Lasela, te avaga a Manoa, mo Ana.

Mea a'koga mo fakamāina ei a te mataupu:

Te ata o te agelu e tapa ki a Sakalia.

Fakatomuaga:

Te vaiaso ko teka tatou ne faipati ki te tino kivi kae nei ko te tino gugu.

Akoakoga:

A Sakalia ne fetau mo te Agelu a te Alik i te Faletapu kae ne seki tali-tonu ki te fekau tela ne vau mo ia mai i te Atua, tela ne gugu ei a ia ke oko ki te aso ne fanau ei a Elisapeta kae ne fakaigoa ne Sakalia ki a Ioane e pela mo te fakatonuga a te agelu. I te taimi foki loa tena ne toe faipati ei a Sakalia.

E akoako mai ne te tala tenei ki a tatou ke tali'tonu tatou ki akoakoga mo fekau a te Alik mo tatou. Ke moa e fakalotolotolua a tatou ma maua ne tatou a fakaasiga a te Alik e pela mo Sakalia, kae ke tali'tonu a tatou ki ei mo tou loto katoa.

Mea fai a tama'liki:

Ke fakatu te tala o Sakalia ke fai ne tamaliki.

Fuaiupu Tauloto: Luka 1:75 "Ke tapu kae ke amiotonu foki tatou i ona mata, i aso katoa o te tou olaga."

Pese: Jesus is the way, the truth and the life.

Talosaga: Te Atua fesoasoani mai ke tali'tonu faeloa matou ki au fakatonuga. Amene.

VAEGA 6: ULU MANUMALO, MATE, TOETU O IESU

Ulutala 25: KO ULU MANUMALO IESU KI LOTO I IELUSALEMA

Pogai: Ke atiake a te iloa o tamaliki me ia Iesu ko te fakaola o tatou

Tusi Faitau: Mataio 21: 1—11

Fakatokaga mo Faiakoga:

Te Ulumanumalo o Iesu ki loto i Ielusalema se ata tafasili i te gali tela e lavea iei a ia se tupu mo te Fakaola o te lalolagi. A Petefake (te fale mati) se fa'kai foliki tela e tuu pili ki te mauga o Olive te koga tela e lavea lei mai i konaa a Ielusalema. A te asini mo te tama asini ne aumai Ktoa kia Iesu mo sopo a ia iei (f.7) me "e manako ki ei te Alikii". Te mea tenei ne fai ne Iesu e fakataunu i ei a muna a te pelofeta ko Sakalia (9:9) me ko fakaasi ne Iesu me i te ia se tino o te filemu kae ese fakavae a tena malo ki malosi mo te fia maluga. E seai loa se fakaasiga o Iesu me i te ia se tupu, kae i te taimi ne sopo ei a ia iluga i te asini, a ona soko ne fola a gatu o latou i te auala kae ka'liga mo te leo lasi mo lau-paama i olotou lima, "ke manuia a te tupu tela e vau i te igoa o Tavita!" Ne uate a tino i Ielusalema ona ko te faifaiga tenei.

Fakatomuaga: Kai sopo aka koe i tua o te asini? Io me kai lavea ne koe se asini? Te aso tapu tenei, ko te tala i te ulu manumalo o Iesu ki loto i Ielusalema.

Akoakoga

e fakaaloalo a tu tatou ki sose tino e taaua kii i tou olaga. E pena te malaga o Iesu e fakaataata ei tona loto mamlalo o ia tela ne fakaaoga ei ne ia te manu tenei ko te asini kae se ko te solofanua. Telala, tamaliki se tulaga ke ola te manatu tenei te lotomalalo mo te fakaaloalo i tou olaga sau katoa kae maise la ko tou fakaaloalo ki te Atua tela ko ia te tupu o tatou tino katoa.

Ke masaua foki ia taua tamaliki me ia Iesu ko tou fakaola tela ne mate mo fakamagalo tou agasala.

Fuaiupu Tauloto:

Faitau 8 –9e tokouke tino ne fola olotou gatu i te auala, ka ko nisi tino ne fati ne latou a kaula mo fola te auala. A te vaitino kola ne sasaele i mua mo tua o Iesu,

ne `kalaga penei, "ke vikia te tama a Tavita. Ke manuia a ia tela e vau i te igoa o te Aliko! Ke vikia te Atua

Pese: Fili mai tusi pese

Talosaga:

Te Atua, aumai kia matou se loto aava mo te fakaaloalo ke ola ia matou.

ULUTALA 26: KO TE FAKA SATAULOGA O IESU

Pogai: Ke fesoasoani ki tamaliki ke lavea ne latou a te faigata mo te `mafa o te amoga ne amo ne Iesu kae maise a tona sataulo i tena auala ki Kalevalia

Tusi Faitau: Ioane 19: 16—27

Fakatokaga mo Faiakoga

A uiga fakamotu loto, ko muna masei, muna loi mo amioga se tonu katoa ne fai kia Iesu i taimi o te fakamasinoga, te fakasalaga ke oko ki tona mate ko toe logo maega tafasili i te masei. Ka tuku tasi a mea katoa kona, fakatasi mo te mataga o tena mate i te sataulo ko taku a mea konna ko te "sataulo" ne amo ne Iesu.

A te sataulo se lakau faka lava tela e fakasala i ei a tino tafasili i te masei a olotou uiga mo faiga, . Te sataulo e atagina i ei te mate fakalumaluma i tuu mo aganu faka Iutaia. Ne mafa malosia kia Iesu te sataulo o ia ona ko te vaivai o tona foitino i pago mo kini kola ne ave ne sotia Loma kia ia.

Fakatomuaga:

Kooi te tamaliki kooti ne lagona ne ia te tala i te fakasatauloga o Iesu? A te tala ka fakalogologo tatou kiei i te aso nei ko te tala o Iesu i te fakasatauloga ne sotia Loma. Mai tua o tena fakamasinoga ne te Kovana ko Pilato, ne iku ei ke fakasataulo.

Akoakoga:

E maina i te tala me ia Iesu ne fakasataulogina i tuapa o Kolokota. A puapuaga ne fakafeagai mo Iesu, fai mai mene talia katoatoa ne ia a ona puapuaga. I te taimi ne fakasataulo ei a Iesu ne seki fakafiti kae ne kufa-

ki eiloa. Kafai e mafaufau tatou ki te mea ne fai ne Iesu, ailoga e isi se tino i te lalolagi tenei e mafai ne ia o fai pela mo Iesu. E seai se tino e mafai ne ia o kufaki a mea `see o nisi tino. E seai foki se tino e fiafia o mate mo te sua tino. Telala, e `tau mo tatou tamaliki o kufaki kae loto fakamagalo ki nisi tino kote mea ke fiafia mai te Atua kia tatou.

Mea fai a Tamaliki:

Usu te pese tela e autu tonu ki te Fakasatauloga o Iesu

Fuaiupu Tauloto: Efeso 2:5

Pese: Fili mai tusi pese

Talosaga:

Te Aliko, fesoasoani mai kia matou fanau ko te mea ke ola matou i te olaga kufaki mo te olaga loto fakamagalo, Amene.

ULUTALA 27: KO TE TOETU MANUMALO O IESU KELISO MAI TE MATE

Pogai: Ke fakaasi io me fakamautinoa ki tamaliki me ia Iesu ne toetu mai ake loa mai te mate

Tusi Faitau: Maleko 16: 1—8

Fakatokaga mo Faiakoga:

Te toetu manumalo o Iesu ko te toe fakamoemoega ola loa o te Kelisiano me ona a Iesu ne toetu, telala tatou e toetu fakatasi mo ia manafai e talitonu `patonu tatou ki tena mate mo tena toetu manumalo (1 Kolinito 15:1—7). Tenei te `kesega a te talitonuga Kelisiano mo niisi talitonuga, aua me i niisi talitonuga, a tino kola e talitonu latou kiai ne seki toetu ake mai te mate, ka ko te tala ne lavea ne tatou mai te tusi faitau me ia Iesu e galo i loto i te tanuga e fakaasi mai iei, me ia ia ne toetu mai loa mai te tugamau.

Mea akoga mo fakamaina ei a te mataupu

Te ata o te toetu o Iesu

Fakatomuaga:

E mata e isi se tamaliki kai logo me isi se tino ne toetu ake mai te mate? Ia fakalogo mai ki te tala o te tino tela ne toetu ake mai te mate.

Akoakoga:

Tamaliki ko te mea ke talitonu `patonu tatou me ia Iesu Keliso ne toetu ake e iloa mai te mate ke mafai o fakaola koe mo au mo tino katoa. E manakogina e tamaliki ko Iesu Keliso ke ola iloto i taa olaga e auala I te talitonu io me talia ne taua a ia ki taa olaga ko te mea ke mafai ne taua o fai te finagalo o te Atua.

Mea fai a tamaliki:

Lomi te ata o Iesu I tena toetu mai te mate

Fuaiupu Tauloto: Maleko 16: 6 "Ne fai mai a te tino tena kia latou, ana muna, sa `matakū. A koutou e `sala kia Iesu te Nasaleta tela ne fakasataulo. E se i konei, ko oti ne toetu..."

Pese: OH! HOW I LOVE JESUS...

Talosaga:

Fakafetai te Atua mo te manumalo e auala i te toetu ake koe mai te mate te la ko mafai ne matou o manumalo i omotou olaga sasaele mo koe,

MANATU FAKAVAE – KILO KI A IESU**VAEGA 4 – KO TENA FANAU MAI****ULUTALA 28: KO TE FOLAFOLĀGA KI A MALIA**

Pogai: Ke akoako a tamaliki ke iloa ne latou a te fanaumaiga o Iesu fakatasi foki mo tena tupuakega.

Tusi Faitau: Luka 1:26–38

Fakatokāga mō Faia'koga:

Mai tua ote ono masina ne fakaasi atu iei a Kapilielu kia Sakalia, ako Elisapeta e faitama iei, ako ono ana masina. Ne oko foki tefakaasiga mai ite agelu ko Kapili-elu kia Malia ite fakai o Nasaleta, i Kalilaia. A Malia, tela se taupou kae ko nofo nei mo Iosefa. Iosefa se tino mai ite gafa o Tavita. Aia se kapenita kae ne fa-katonugina aia ne te Aliko i tena miti, ke fai ne ia a Malia mo fai tena avaga. Te agelu tela ne vau mote fekau kia Malia, ne seki ifo kia ia, kae ne fakatalofa atu fua kia Malia. Ne fai atu kiei te agelu, ia ia ko oti ne filifiligina ke fai mo matua ote Fakaola.

Lesona:

Mai tua ote ono masina ne fakaasi atu iei a Kapilielu kia Sakalia, ako Elisapeta e faitama iei, ako ono ana masina. Ne oko foki tefakaasiga mai ite agelu ko Kapilielu kia Malia ite fakai o Nasaleta, i Kalilaia. A Malia, tela se taupou kae ko nofo nei mo Iosefa. Iosefa se tino mai ite gafa o Tavita. Aia se kapenita kae ne fakatonugina aia ne te Aliko i tena miti, ke fai ne ia a Malia mo fai tena avaga. Te agelu tela ne vau mote fekau kia Malia, ne seki ifo kia ia, kae ne fakatalofa atu fua kia Malia. Ne fai atu kiei te agelu, ia ia ko oti ne filifiligina ke fai mo matua ote Fakaola.

Mea a'koga mo fakamāina ei a te mataupu:

· Ata #51

Vitio kaseti (mafai e isi e toka)

Fakatomuaga:

Mata e isi se tino ne vau ki te lalolagi nei i se auala fakaatea me ko tatou ne fa-nau katoa mai ne 'tou matua? Te mea e 'kese iei a Iesu, me koi tuai a ia o fanau mai kae e isi ne fakaasiga io me ne fakailoaga ne oko mai ki ona matua.

Akoakoga:

Tamaliki, a te fanau mai o Iesu, e 'pau eiloa mo te fanaumaiga o ta-tou katoa mai 'tou matua, kae e 'kese fua me ona koi tuai a ia o fanau mai, kae ko oti ne fakailoa ne te avefekau a te Atua ki a Malia me ka fanau

mai ne ia a te Fakaola. Ne filifiligina a Malia ne te Atua kae ne fakaoko mai a tena fekau e auala i te agelu. Te mea taua ke iloa ne tatou i konei, me i te Atua e pule ia tatou, e iloa foki ne ia a mea kola e fai ne tatou. Ona la ko Malia, se fafine e `gali ona uiga, kae fai foki ne ia a te loto o te Atua, tela ne filifiligina ei a ia ne te Atua ke fai mo matua o Iesu, te Fakaola o te lalolagi. Kae ne tupu ake foki a Iesu, ne tausi faka'lei ne ia, ne putiputi ake ne ia ke oko e iloa ki tena matua. A tatou foki e mafai o filifiligina ne te Atua ke fai ne tatou ne tusaga lasi kae taua mô ia manafai e ola tatou o fai tena finagalo i `tou olaga.

Mea fai a Tamaliki:

· `Kala fakagaligali a te ata #51

Pese: Ne nonofo i te vao leoleo mamoe io me fili mai tusi pese

Fuaiupu Tauloto: Luka 1:31 "Kiloke, a koe ka faitama, ka fanau ne koe se tama tagata, kae ka fakaigoa ne koe a ia, ko Iesu."

Talosaga:

Te Atua te motou Tamana alofa, fakafetai kooti ne fakalogologo matou i tala ote fanaumaiga mo te tupuakega o Iesu, te motou Fakaola. Akoako mai matou, ke kilo atu matou ki a koe Iesu te Fakaola o matou, kae ke ola matou o fai te mea tela e loto koe ki ei, Amene.

ULUTALA 29: KO TE FOLAFOLĀGA KI A IOSEFA

Pogai: Ke akaoko a tamaliki ke iloa ne latou me ia Iosefa ne kalagagina ne te Atua ke fai mo tamana o Iesu.

Tusi Faitau: Mataio 1:18–25

Fakatokāga mô Faia'koga:

A Iosefa ko te tamaliki a Iakopo (Mata.1:16), ne vau mai te gafa o Tavita (Mata.1:20) kae se tagata e matakū ki te Atua (Mata.1:19). A Iosefa ne avaga kia Malia ako la tama ko Iesu, Iakopo, Iosefa, Simiona, mo Iuta; kae e isi foki ne olotou tuagane (Mata.13:55-56).

A Iosefa ko te tamana o Iesu (Luka.4:22; Ioa.1:45; 6:42). E isi se fakasalaga e mafai o oko ki se tamafine tela e fai feagaiga ke avaga kae moe mo te sua tagata mai lalo o tulafono faka-Iutaia (Teu.22:23-24). A Malia e seki moe mo se isi tagata tenei ne faitama i ei; a ko Iosefa ne manako o lepe malie tela feagaiga mo Malia me ko faitama, ke e seiloa ne ia me ne faitama iai.

Fakamuli ifo ne maina lei a ia e uiga mo te mea ko tupu i te fakaasiga tela ne fakaoko atu ki a ia i te moemiti, tela ne avaga ei a laua. A Mataio (1:18-25) mo Luka (1:26-56; 2:1-38) e kesekese a tala a laua e uiga ki te fanau mai o Iesu kae ko laua foki loa konei ne avake ne laua te tulaga "tamafine" o Malia. A Malia ne talia ne ia te fekau a te Atua i tona talitonu i a ia se tavini a te Aliko (Luka.1:38). Ne fakafetaui ne Elisapeta a tena kaiga ko Malia ki muna fakamutia penei: "Amutia koe i fafine katoa" (Luka.1:42). Ne ave ne ia a tena tama ki te faletapu kae ne fakamaonia ne Ana mo Simiona a te fanau mai o te Mesia kae ne 'tao atu mo tena muna ki a Malia penei: "A tou fanoanoa ka fakatusa ki se pelu mata kai, ka suki ne ia a tou loto" (Luka.2:35).

Lesona:

Te fanau mai o Iesu e kese mai i te fanau o tino katoa. Malia ko filigina me ka fanau mai ne ia Iesu, te Fakaola. Kae ko ia ka faitama ite agaga tapu. E fa-kaofogina te tulaga tenei, kae ne faigata foki kia Iosefa ona me ese mala-malama ite fakasiga tenei ne oko kia Malia. On ko tu mo faifaiga, tela ne faigata iei o talia ne Iosefa, kae ne mafaufau ke mavae laua mo Malia. I taimi tonu e iloa tenei, ne oko mai iei te fakasiga ate Aliko kia Iosefa ke avaga ne ia a Malia, me ko faitama ite agaga tapu, kae ka fanau ne ia te tama tagata, kae ka fakaigoa kia Iesu, me ka fakaola ne ia a tino katoa. Malia ne matakū, kae ne fakamalosigina ne te agelu, kese matakū, me ko oti ne filifiligina aia mai i loto i te tokoukega o fafine.

Mea a'koga mo fakamāina ei a te mataupu:

Ata #53

Fakatomuaga

Tamaliki, koutou e isi katoa ne outou tamana. Ia kae nei, koutou ka fakalo-gologo ki te tala o te tamana o Iesu tela ko Iosefa

Akoakoga:

A Iosefa ne kalagagina ne te Atua ke fai a ia mo avaga a Malia, me ia Malia ka fanau mai ne ia se tamaliki tagata, kae ke fakaigoa ne laua ki a Iesu, me ka fa-kaola ne ia a tino katoa mai i olotou agasala. E lua a akoakoga tãua e maua ne tatou i te tala o te taeao nei:

1. Ko te filifiliga a te Atua
2. Ko te fakalogo o Iosefa

A tatou taki tokotasi, e filifiliginina katoa ne te Atua i `tou olaga ke fai ne tatou ne tusaga tãua mô ia i te lalolagi nei, kae manakogina la iei ko tatou ke faka'logo ki ai

Mea fai a Tamaliki:

- Tauloto a te Fuaiupu Tauloto
- Faifesili mo tamaliki ki fesili kola e autu tonu ki te ulutala o te aso nei. Fakafesili ki tamaliki taki tokotasi me mata la nei seâ a te fi-nagalo o te Atua mô latou.

Pese: When the Saviour calls io me fili mai tusi pese

Fuaiupu Tauloto: Mataio 1:20"Iosefa te mokopuna o Tavita, sa matakou o fai Malia mo fai tau av-ga, i te mea ko faitama i te Aga-ga Tapu".

Talosaga:

Fakafetai lasi te Atua alofa mo `tou alofa tumau mo matou, kae maise ko te tuku mai ne koe o tau tama fagasele ke mate mo omotou agasala ke fakamagalogina. Fakamanuia mai mo matou ke fai matou mo tamaliki e ola talitonu ki a koe i aso katoa o motou olaga, ona ko Iesu. Amene.

ULUTALA 30: KO TE FOLAFOLĀGA KI TAUSI MAMOE

Pogai: Ke fakamatala ki tamaliki me ne fakaasi foki ne agelu ki tausi mamoe i te vao me ko fanau mai a te Iesu, te Fa-kaola o te lalolagi.

Tusi Faitau: Luka 2:8-20

Fakatokāga mô Faia’koga:

A tausī mamoe o Palesitaina e fakatulaga me ne tino mativa, e nofo ki te taki selau a olotou mamoe e tausī. Te mamoe se manu e lauiloa a tona aoga i fenua konei ona me maua i ei a olotou sene; e fakaaoga a olotou fulufulu mo faite a gatu moko, ako susu e fa-kaaoga mo inu, mo fai foki a meakai. A pakili e fakaaoga mo faite a taka mo gatu ako kano mo kai, ako sinu e fakaaoga mo fai a nisi meakai. I te sua faitu, a tausī mamoe e galue malosī o sala a koga mo fagai kae fainu a olotou manu, ona mene koga lavaki kae se ola lei a mouku me se uke a vai. Te galuega faigata a tausī mamoe ko te tausī fakalei a olotou mamoe mai i manu fekai mo tino kaisoa fakatasi i ei mo te tau moko. A te galo o se mamoe e tasi se matua mea faka-fanoanoa ki te tausī mamoe. A te uiga o te muna ‘Agelu’ i te gana Eleni se “faifekau”. Te agelu ko te faifekau faka te agaga a te Atua. E pela mo tala i Pateleake (Kene.16:7-14;19:1-22; 22:11, 15-18) ke oko ki fekau ki nisi tino Eso.3:2; 23:20-23; 33:2; Fama. 13:3-5; 1Tupu.19:5-7; 2Tupu.19:35; Isa.37:36). A faifekau konei e seai ne foitino o latou Sala.91:11-12), e fakaaoga foki i nisi taimi ke fakaoko ne latou te fakamasinoga a te Atua (Mata.13:49-50).

Lesona:

A tausī mamoe e nofo ite vao, ite po kae fakaasi atu te agelu mo te fekau kia latou me ko fanau te Pepe o Peteleema ite fakai o Tavita. Te agelu, ko te avefekau ate Atua. Ite mataupu silisili, a Iesu kote Fakaola, ko ia foki ko te Keliso, te Atua Fauu kae fakata-pu, ko te Mesia. A Ia foki ko te Alikī. Muna te agelu, ka maua atu ne koutou te tamaliki e pulupulu ki laugatu, kae e fakamoe aia Ilo to ite tali fagai manu.

Mea a’koga mo fakamāina ei a te mataupu:

Ata 55

Fakatomuaga:

Kafai a te po ko pouli aka loa kae `nofo tatou i te vao, kae sae fakavave mai se mainaga pula kae lasi, mata tatou e poi kae ma’taku?

Akoakoga:

A fakaasiga katoa konei ne `tupu, ne mea katoa e molimau mai ne ;latou a te `kese mo te `malu o te tamaliki tenei ka fanau mai. Ko `kese mai fanaumaiga o tino katoa kola ne fanau mai mua o Iesu, kae ke oko foki loa ki aso nei, seki ai loa se tino ne fanau mai ke isi ne fakaasiga pela mo fakaasiga konei ne `tupu i te taimi ne fanau mai ei a Iesu. A tausi mamoe kaati ne `poi katoa kae matakū me sea la a te mainaga lasi tenei ko maina mai luga o latou. Ne `poif oki me ko sae mai a te agelu o folafola mai a te Tala `Lei ki a latou e uiga mo Iesu. Tamaliki, a te Tala ne aumai ne agelu ki tausi ma-moe, e tenei eiloa koi tumau a tena folafola mai ke oko ki te taeao nei; ko fanau mai a te Keliso te Aliko ko Iesu, ea, kai talitonu eiloa tatou me ia Iesu ko te Keliso, te Aliko mo te Fakaola o tatou? Ke na talia ne tatou a ia ki `tou olaga i te taeao nei ke vau a ia o fai mo Aliko tumau o `tou olaga i aso katoa.

Mea fai a Tamaliki:

· `Kala fakagaligali a te ata #55
Tauloto a te fuaiupu tauloto ke maua faka`lei

Pese: Ne nonofo i te vao leoleo mamoe io me fili mai tusi pese

Fuaiupu Tauloto: Luka 2:10,11 "Sa ma`taku, kiloke ko aumai ne au a te `lei mo koutou, ka fakafiafia ei a tino katoa. I te po eiloa tenei i te fa`kai o Tavita, ko fanau ei te outou Fakaola ko Keliso te Aliko "

Talosaga:

Te Atua te motou Tamana alofa, fiafia omotou loto i tou alofa mo matou. Ko fakaasi mai ne koe ki a matou a te fanau mai o tau tama pele ko Iesu, tela ko te motou Fakaola. Fakamalosi mai matou ke iloa ne matou o a`lofa ki a koe i aso katoa o motou olaga. Amene.

ULUTALA 31: KO TE FANAU MAI O IESU

Pogai: Ke akoako a tamaliki ke māina i te `tala o te fanau mai o Iesu.

Tusi Faitau: Luka 2:1-7

Fakatokāga mô Faia'koga:

Te tusiga igoa (census) te la ne fakatonu ne Kaisala Aokuso kae ko Kulenio ko te kovana o Sulia e fakapatonu kae fakamailoga i ei a te taimi (date) ne fanau i ei a Iesu. Ko tona uiga, i loto i gasologa o tala tuku fakasolopito o te lalolagi, ne gaki mai i ei a te Atua mo ana fuafuaga, mo tena palani fakaola ke faka-galue mo tino o te lalolagi. A Iosefa ko te tamaliki a Iakopo (Mata.1:16), ne vau mai te gafa o Tavita (Mata.1:20) kae se tagata e matakū ki te Atua (Mata.1:19). A Iosefa ne avaga ki a Malia ako la tama ko Iesu, Iakopo, Iosefa, Simiona, mo Iuta; kae e isi foki ne olotou tuagane (Mata.13:55-56). A Iosefa ko te tamana o Iesu (Luka.4:22;. 1:45; 6:42). " ... fakamoe i te tali fagai manu, me ko seai se koga mo latou i te faletalimalo " te ata o te tavini loto malalo kae 'e se kai filifili' me seai i a ia te loto fia sili kae ko te loto alofa mo tino katoa.

Lesona:

Ne fakatonu ne Kaisala Aokuso ke fai te tusiga igoa i fakai o tupu-ga o latou. Ko Kulene i ei te kovana o Sulia. Kaisala Aokuso ne pulepule mai ite 27 TMK ke oko ki te 14 TMTK. A Iosefa mo Malia ne aumai kite tusiga igoa, kae ko te taimi tonu foki e iloa ne fanau iei a Malia. Ko te fakataunu ga ote valoaga ne fai ne te pelofeta ko Mika 5:2 Muna ate Aliko "Peteleema Efalata, a koe se fakai e tasi mai fakai foliki e iloa o Iuta, kae ka ava ka ne au mai i a koe se pule mo Isalaelu, ko tena gafa e vau mai aso mua e iloa." I te okomaiga ki Peteleema, ko fonu te fale talimalo, kae ko seai se koga mo nofo iei.

Mea a'koga mo fakamāina ei a te mataupu:

Ata #54

Fakatomuaga:

Kai isi aka loa se tamaliki i Tuvalu nei ne fanau i loto i se pamoā, pa-takio me se saipuaka?

Akoakoga:

A te fanau mai o se pepe ki loto i se kaiga, se fakafiafiaga lasi ki loa ki matua mo kaiga o te pepe kae maise ko te tamaliki muamua loa tela ko te ulumatua. A matua e masani o fakatoka saale ne laua a kope o te

pepe pela mo pitaake, ko te tiisi kōkou, susu mo niisi mea aka foki. Amutia tatou kola ne fanau i te fa-kaimasaki io me i loto i se fale gali kae mafanafana, kae fai mai a te Tusitapu, me ia Iesu ne fanau fua i loto i te fale e tausī ei a manu pela mo pulumakau mo kouti mo mamoe, ona me ko seai se avanoaga mo latou i loto i fale talimalo. Tamaliki, a te fanau mai o Iesu i loto i te fale manu se fakaasiga o te auala o te loto maulalo kae se ko te fiamaluga mo te fiasili. Tela la, ke fakaakoako tatou ki te Alikī ke ola tatou i se olaga loto maulalo mo te alofa.

Mea fai a Tamaliki:

Kala a te ata #54.

Fai a fesili mo atili fakamāina ei a te tala o te taeao nei.

Pese: "Ko fanau mai te pepe..." io me fili mai tusi pese

Fuaiupu Tauloto: Mataio 5:5 "Amutia a latou kola e loto malalo me fai ma latou a folafolaga a te Atua."

Talosaga:

Te Atua te motou Tamana alofa, fakafetai mo te fakaasi mai ne koe se ata fakaakoako ki a matou, ko te mea ke ola matou i te loto maulalo. Fesoasoani mai ke mafai ne matou o ola i loto i tou finagalo. Amene.

ULUTALA 32: KO MEAALOF A TINO POTO MAI I TE SOPO GALA.

Pogai: Ke fakamaina ki tamaliki, me i te fai meaalofo ki te pe-pe ko Iesu, se faifaiga e fakamalosi ne ia a te fai mealofa o tatou ki te Atua.

Tusi Faitau: Mataio 2:1-12

Fakatokāga mō Faia'koga:

Peteleema (te Fale o Falaoa) se fakai foliki tela e lima maila ki te feitu ki Saute o Ielusalema, kae e tusa mo te 750 meter te maluga mai i te levolo o te tai. Tenei te fakai o Tavita mo ana matua (1 Sam.16:1;

17:12). Ne takutakua malosi te fakai tenei mene fa-nau mai i ei a Iesu (Mika.5:2; Mata.2; Luka.2; Ioa.7:42). A Helota te Sili (Herod the Great) ko 'te tupu o tino Iutaia' i te tai-mi ne fanau ei a Iesu kae a ia ne mate foki loa i te tausaga foki loa tena i te 4 B.C. Ko Helota tenei ne faite ne ia te Faletapu i Ielusale-ma tela ne kamata i te 20 B.C kae ne oti lei i te A.D.62 ka ko Faletapu i Ielusale-ma tela ne kamata i te 20 B.C kae ne oti lei i te A.D.62 ka ko leva ne mate i ei a ia. A Helota te Sili ne sui ne tena tama ko Helota Anitipa (4 B.C-A.D.39) tela ne feagai mo Ioane te Papaptiso mo Iesu (Mata.14:1-12; Male.6:14-29) Iesu se meaalofa tena a te Atua te Tamana mô tatou tino katoa, ne tuku mai tena ola ke mate a ia mô 'tou agasala ke fakamagalogina. Seâ la nei a 'tou tali ka tali atu ki te alofa o Iesu mo tena Tamana? Tamaliki, ke tuku atu foki a 'tou ola mo 'tou foitino ke fakaaoga mo fai a te finagalo o te Atua i te lalolagi nei i aso katoa e ola ei tatou. Luka.3:19-20; 9:7-9; Male.8:15; Luka.13:31-32; 23:6-16; Galu.4:27). A tena tulaga ne fakase ne tona fiafai ki a Helotia tela e fakatamana ki a ia, kae avaga mo tena taina ko Hel-otia tela e matua kesekese laua. Ona ko tena manakoga tena, ne mavae ei a ia mo tena avaga, kae avaga mo Helotia. A Ioane te Papatiso ne fakaasi ne ia a tona se fiafia ki tona uiga tena, tela ne pei i ei ne ia a Ioane ki te falepuipui kae fakamuli ifo ne kati a tona ua i te manakoga o Helotia (Mata.14:1-12; Male.6:14-29; Luka.3:19-20; 9:7-9). Ko Helota foki loa tenei ne fakamasino ne ia a Iesu (Luka.23:6-16; Galu.4:27). A tino Poto mai te Sopogala i te gana Eleni 'Magi' e fakauiga ki tino fakataulaitu; kae i a Mataio (2:1) e fai mene aumai mai te Sopoga-la kola ko fenua faka Alapi mo Mesopotamia. A tino Poto konei ne poto i mea tau fetu me tela e takitaki ne te fetu (2:2) kae ne tino o fenua fakatea me e 'se iloa ne latou a muna a pelofeta e uiga mote koga ka fanau mai o Iesu (2:2-6). Ona me tolu a meaalofa (2:11) ne tuku ki a Iesu, ko tuku taumate ei me tokotolu a tino Po-to mai te Sopogala, ka ko latou kona ne tupu e pela mo te moli-mau a Isaia (60:3).

Lesona: I te vaitaimi tenei, ko taimi o te tupu ko Helota. Ne logo te tupu ite Keliso ko fanau mai, kae ne lamalama ne Helota ke tamate neia Iesu ka ko nofo iei a Malia mo Iosefa mo te pepe i te fale o manu. A Helota ne vau ite gafa o Esau, tela e fai fili mo tekau Iutaia. Ko pilipili

ki te oti o tena nofoaiga, kae ne malaga mai iei a tino poto mai ite Sopogala o sala ate Tupu ote kau Iutaia. Ona ko te tulaga atamai o latou, tela e filifiligina sale faeloa latou ke ola o faipati ki te tupu. I te malaga o olo o sala te Tupu, e lavea ne latout e fetu pula, ka mai ite lotou maina i fetu, mote faitau foki ki tusi-tusiga fakapelofeta, eiloa ne latou o fakamatala te uiga o te fetu pula, me ko te fetu o te Tupu. Ne taki latou ne te fetu ki te koga tela e fanau iei ate Pepe. Ne lafo olotou meaalofa kite Pepe o Pe-teleema, te Fakaola o tino katoa.

Mea a'koga mo fakamāina ei a te mataupu:

· Ata #57

Niisi ata mafai e isi

Akoakoga:

A tagata poto konei mai i te sopoga'la ne faimalaga mai o `sala, o faimeaalofa kae o tapuaki ki te Aliko, te Fakaola tela ne lavea ne latou a tona fetu fakatino. Ne mai latou mo te mautinoa mo te loto tali'tonu ko latou ke oko ki te fale e fanau ei a te Aliko. E `pau eiloa mo tatou i aso nei, e lavea ne tatou a tino e fai meaalofa saale foki ki tamaliki foliki mo tino kola ko fai olotou asofanau, mea nei ne fakaasiga katoa o te a'lofa mo te amanaia ne tatou a te tino tela io ia a te asofanau. A te fanau mai o Iesu se meaalofa tena a te Atua te Tamana mō tatou tino katoa, ne tuku mai tena ola ke mate a ia mō `tou agasala ke fakamagalogina. Seâ la nei a `tou tali ka tali atu ki te alofa o Iesu mo tena Tamana? Tamaliki, ke tuku atu foki a `tou ola mo `tou foitino ke fakaaoga mo fai a te finagalo o te Atua i te lalolagi nei i aso katoa e ola ei tatou.

Mea fai a tamaliki:

· `Kala a te ata #57

Faifesili ki fesili e autu tonu loa mo te `tala a tatou i te taeao nei.

Pese: Tuku tau Meaalofa mo te Aliko....io me fili mai tusi pese

Fuaiupu Tauloto: Mataio 2:6 "A koe foki e Petelema i te fenua o Iuta, ka sili atu tou taulia i Aliko o Iuta; me e tupu mai ia koe se takitaki tela ka pule ne ia toku fenua ko Isalaelu."

Talosaga:

Te Atua o te Alofa tauanoa, fakafetai matou mo te tala gali. Kae akai matou ke fesoala oani mai koe ki omotou olaga, ke fiafia matou o `sala faeloa ki a koe i omotou o-laga, kae maise, ke fiafia foki ma-tou o ʻōla mō koe. Amene.

ULUTALA 33: TE ASO OTE TALA `LEI

Pogai: Ke akoako a tamaliki ke maina fakalei me i te Tala Lei ko te tala o te fakaolataga tela ne fuli ne ia a olaga o tino mai te pouliga ki te mainaga o Iesu.

Tusi Faitau: Luka 2:8-20.

Fakatokaga mo Faiakoga:

Te Aso Fiafia o te Tala Lei i Tuvalu e fakamanatu i ei te okoga mai o te lotu io me ko te Tala Lei a Iesu tenei e fakavae kae tausi ne te Ekalesia Kelisiano Tuvalu.

Te aso fiafia tenei e fai i ei te tapuakiga fakapitoa tela e fai i te lua o Aso Tapu o te masina o Mee. E masani o fakamatala a tala o te oko maiga o te Tala Lei ki Nukulaelae mo fenua katoa o Tuvalu. E tenei foki te taimi e fai ei a taulaga tupe a kaiga, fakapotopotoga mo vasega, ke oko ki tino takitokotasi ki te Ekalesia mo fai ana galuega pela foki mo polokalame e atiakega i ei a olaga faka te agaga o tino. E fakasoko te polokalame ki tau-pese i te po mo te fakaala mo faiga fatele i te Aso Gafua.

Mea Akoga mo fakamaina te mataupu:

Ata o Iesu

Ata o faifeau Samoa kola ne galue i Tuvalu

Fakatomuaga:

Fesili ki tamaliki me kaia e se fiafia ei a latou ki lotu mo te akoga i Aso Tapu?

Akoakoga:

Te Tala Lei a Iesu ne fuli ne ia a olaga o tino i Tuvalu ke lei. I aso tau-mua, a tino i Tuvalu e ifo ki tupua kae nofo mo olotou atua faite, kae

atamai foki i poto fakataulaitu. Te olaga faitaua mo te loto masei e fakamasei ne ia a va o fenua mo potukau. A avaga e puke ki mafi mo uiga pouliuli pena. A amioga mo uiga katoa kona ne avekeatea ne te Tala Lei kae ko fou a olaga o tino; e tena te pogai e taua ei te aso fiafia tenei.

Mea fai a tamaliki:

Lomi te ata o te vaka o Elekana kae e peipei ne galu i te matagi malosi

Lomi te ata o Elekana mo tena Tusi Tapu i tona lima kae akoako a tino i Nukulaelae

Fuaiupu Tauloto:

Loma 1:16(a) "I au e se ma i te Tala Lei; i te mea ko te mana o te Atua e fakaola i ei a latou katoa e fakatuanaki."

Pese: Fili mai tusi pese

Talosaga: Te Atua Tafasili i te Malosi, fakafetai mo olaga o au tav-iniloto lasi kola ne kufaki ne latou a vasa mo afa kae ne fakasao ne koe ko te mea ke maua ne matou a te Tala Lei o te Fakaolataga i a Iesu. Fakamanuia au tavini kola e feagai mo faigataga ona ko te folafolaga o tau Tala Lei, amene.

ULUTALA 34: TE ASO O MATUA

Pogai: Fakamatala ki tamaliki ke maina lei i te Aso o Matua e fakamasaua i ei a tusaga lasi kola e fai ne matua mo latou, mo te kaiga e pela foki mo tulaga kesekese o te olaga.

Tusi Faitau: Fataoto 31:10-31

Fakatokaga mo Faiakoga:

Te Aso Fiafia o Matua e fakamailoga i ei te tulaga mo te tusaga o matua i loto i Tuvalu ona ko te taua o tusaga e panaki mo latou kamata mai i te fale, te kaiga mo fanau, te Ekalesia, te fenua i Fale-Kaupule mo fakapotopotoga a fafine mo tulaga kesekese i te malo mo te olaga faka Tuvalu. Ne talia ne te Fono Lasi i te 1986 ke

fakamailoga te Aso Tapu o Matua i te toe Aso Tapu o Iulai. Ne filigina ne fafine a te aso tenei e fakamanatu foki ei te Mafutaga a Fafine o te Ekalesia Kelisi ano Tuvalu. A fiafiaga o te Aso o Matua e tala loa ki tapuakiga i te Aso Tapu tena i te lotu taeao mo te afiafi kola e fakatoka kae takitaki ne fafine. E tenei te taimi tela e uke a meaalofa e fakatoka ne tamaliki ma olotou matua, e fakatino i ei te fakafetai a latou mo te tausiga alofa a te matua ki a latou. A tagata i te aso tenei e kuka kae fakatoka a meakai mo fakagaligali te Aso o Matua. A fakafiafiaga e fakasoko ki taupese mo koniseti i te po mo fakaala, fatele mo siva i te Aso Gafua.

Ko fakataua malosi a te tusaga faka-matua i loto i te Fenua, Ekalesia, mo te Malo; kae fakasilisili ko tusaga faka-matua tela e panaki mo te tausi, akoako, mo te putiputiake o tamaliki. Te tusga faka-matua tena i loto i Tuvalu e se mafai o fakanafagina io me faka-tapulagina. E se gata fua i kona a tusaga o matua, kae i loto i te olaga saukatoa e lasi te tusaga fesoasoani e fai ne latou.

Mea Akoga mo fakamaina te mataupu:

Ata o matua takutakua i Tuvalu

Ata o nisi fafine takutakua i Tusi Tapu, te Pasefiika, mo te lalolagi

Fakatomuaga:

Fesili ki tamaliki taki tokotasi me se a a tena meaalofa ne fai mo tena matua i te Aso Tapu o Matua?

Akoakoga:

Ko akoako mai te muna a te Atua ki Matua me e manakogina a matua kola e fakatuagagina (f.10); e galue malosi (f.17); e kaimalie ki tino mativa mo tino fakaalofa (f.20); kae ava ki te Aliko (f.30). A te aso fiafia o Matua e fakavae ki tapuakiga ko tena uiga, a matua e tau o ola faka lagolago mo te fakatuanaki ki te Atua.

Mea fai a Tamaliki:

Kilokilo fakalei ki te ata o tou matua

Tusi ki lalo a mea gali kae lei ne fai ne ia mo koe

Tusi foki a mea kola i tau fakatau e se lei ei a tona olaga

Fuaiupu Tauloto:

Fataoto 31:30 "A te gali e fakase tino, pela foki te matagali e mafai fua o matafi, ka ko te fafine tela e fakaava ki te Aliko e tau o tavae-gina."

Pese: Fili mai tusi pese

Talosaga:

Te motou Tamana faka te lagi, fakafetai mo omotou matua kola ne tuku mai ne koe. Te Tamana, ke tausi, ke atafai kae fakamanuia ne koe, ko te mea ke ola loa kae ol fiafia i aso koi toe o tona olaga, amene.

ULUTALA 35: TE ASO O TAMANA

Pogai: Ke akoako a tamaliki me e tasi o tiute ote tamana ko ia tela e t'aki ne ia taua fanau kite ola se gata mai.

Tusi Faitau: Kenese 6:1—7:24; 2 Petelu 2:5

Fakatokaga mo Faiakoga:

Te Aso o Tamana ne fakatu mo fakamailoga te taua o te tulaga o te Tamana. Te tamana ko ia kote takitaki. Ese gata fua aia se takitaki tela e tau o t'aki ne ia ana fanau iluga I tena olaga ke lavea ne fanau, kae ko ia se faiakoga foki te la e fakaakoako ne ia ana fanau kite mea tela e manako kiai te Atua. E uke kii a tusaga ote tamana lei tela e tasi mai iei tela ka tauloto ne taua fanau ite taimi nei me ko ia tela e taki ne ia taua fanau kite ola ese gatamai.

Ite tusi ko 2 Petelu 2:5 e lavea iei ne tatou te tiute ne fai nete tamana ko Noa. Ne tala mai me ia Noa kote tokovalu o tino ne ulu ki lotu ite vaka io me kote toe tino loa o ulu ki lotu ite vaka ko tena uiga ne fai te tiute o te tamana tenei kote mea sose tino ioto I tena kaiga ke sao mai te fakasalaga tela kote lolo. Aia ne seki fakavave ki lotu ite vaka ko ia ke sao. Ese taumate e isi se tamaliki se fakalogo, ese fia fano ki lotu ite vaka, kae ne seki fakatamala a Noa I ona tiute. E tena te tiute o sose tamana, a ia kote fakasino ala ko ia foki e fakamalosi I sose auala kite mea loa e mafai ne ia kote mea ko sose tino i lalo I tena tausiga e aofia iei ana fanau ke ulu ki lotu ite vaka io me ke sao mai te fakasalaga ke maua ne latou ate ola ese gata mai.

Mea Akoga mo fakamaina te mataupu:

Ata ote vaka o Noa
Ata o Iesu

Fakatomuaga:

Fesili ki tamaliki me sea te mealofa a ia ki tena tamana kite aso o tamana.

Akoakoga:

Ko akoako mai nete muna ate Atua me ia taua tamana ko takitaki iloto I kaiga tela se tiute o koe kite fakamalosiga ki sose tino iloto ite kaiga ke iloa ne ia Iesu tela e maua ai te ola (Ioane 14:6). Ite taimi o Noa kote lolo te fakasalaga ka kote auala e sao iei te tino kote vaka, taimi nei kote afi te fakasalaga ka kote auala e sao iei ko Iesu Keliso manafai koe e talitonu kae talia ne koe aia.

Mea fai a Tamaliki:

Kilokilo fakalei kite ata otou tamana
Tusi ki lalo a mea lei mo mea gali ne fai ne ia mo koe

Fuaiupu Tauloto: 2 Petelu 2:5 "...Noa kote tokovalu o tino ne ulu ki loto ite vaka..." KJV English translation

Pese: Head, Shoulders, Knees and Toes io me fili mai tusi pese

Talosaga:

Te Aliko, fesoasoani mai kia matou fanau kote mea kote mea kafai matou ko matua ko fai mo tamana ke fai matou mo tamana lei, tamana kola e 'taki ne matou sose tino kite ola ese gatamai.

ULUTALA 36: TE ASO O TALAVOU

Pogai: Ke fakamaina ki tamaliki me i te Aso fiafia o Talavou e fakamailoga i ei te taua o tupulaga ko te mea ke amanaiaquina kae ke fakatauagina.

Tusi Faitau: Failauga 11:9-10:1

Fakatokaga mo Faiakoga:

Te Aso o Talavou e fakamailoga i ei te taua o tupulaga tuputupu o Tuvalu me ko latou konei ko takitaki o kaiga, fenua, malo mo lotu o te aso a taeao. Te aso e fakamasaua ki te lotu tela e masani fai i te vaia so muamua o Aokuso; ako talavou e faitusaga i tapuakiga fakapitoa i te lotu taeao mo te lotu afiafi. E fakasoko ki tau pese i te afiafi mo nisi fakafiafiaga i te Aso Gafua. E isi foki ne akoakoga fakapitoa kola e fakatoka mai ne te Mata-Galuega a Talavou i te Ulu Ofisa o Talavou o te Ekalesia Kelisiano Tuvalu mo fesoasoani ki olaga faka te agaga o talavou. E tokouke a talavou takutakua i te Tusi Tapu e pela mo te tamafine ko Luta mo tamatene ko Tavita i te Feagaiga Mua mo te soko patipole ko Petelu mo tamataene faikimua ko Timoteo i te Feagaiga Fou. A talavou fataua konei ne fai mo tino takutakua i te fakatukanaki ona ko olotou olaga ne fuli ne te talitonu o latou ki a Iesu.

Mea Akoga mo fakamaina te mataupu:

Flash cards

Video i polokalame a talavou i olotou aso fakamanatu

Fakatomuaga:

Fesili ki tamaliki me e fia a tausaga o tino kae lau a tino ki se talavou; kae fia foki a tausaga o tino e gata ei tena fai mo talavou?

Akoakoga:

Ko fakamalosigina ne te mataupu tenei ke atafai kae alofagina a talavou i te lagona kae fakataua a olotou leo mo manatu; fakatasi mo te atiake a olotou olaga i feitu katoa tau te olaga; kae fakasilisili loa ko olotou olaga faka te agaga. A te talavou ka aoga malosia a tona olaga mo tena kaiga, fenua, malo mo te lotu manafai e ola mafuta mo te Atua i taimi katoa.

Mea fai a Tamaliki:

Fesili mo tali (e fakatoka ne faiakoga a fesili)

Fuaiupu Tauloto:

Failauga 11:9 "Tupulaga tuputupu, ke fakafiafia a otou olaga i a koutou koi tupu aka. Fai te mea e loto koutou ki ei, mo te mea e

manako ki ei otou loto. Kae masaua i te Atua e fakamasino ne ia a koutou. Amene.

Pese: Give me oil in my lamp io me fili mai tusi pese

Talosaga:

Te motou Tamana, e tapu a tou igoa kae ke fai te mea e loto koe ki ei. Fakamanuia ne koe a talavou o Tuvalu kae akoako ne koe ke tausi te fakatuanaki tela ne fakavae ne koe Iesu, amene.